



海虞文苑卷之三

邑後學張應遴選卿甫軒

五言古

寓言 二首

張著

彼美嶧陽桐棲老青鸞枝忽朝落樵斧爨下供晨炊中
郎果何人斲之被金徽懷哉山水音世無鍾子期迢迢
序廟志邇來誰復知脫然獻天子當奏南薰詩
皎皎龍泉劍十年塵土中紫氣射牛斗妙理誰能窮一
朝遭博物瑞世光如虹念茲霜雪刃足以空奸雄平危
不見試星皿無由紅時來騰匣去變化爲神龍

古東門行

二一首

張洪

僕夫顧我悲轅馬踟不行古來離別地青艸不復生居
人攀桃李悵望難爲情流塵起阡陌遠樹花冥冥欲向
東門道唱此東門行土中有朽骨聞之復心驚
食荼莫言苦飲醯莫言酸世間號事易惟有離別難既
辭還執袂臨行復據鞍對面相寬解回頭涕已瀾人生
誰非客何獨此哀歎但令長壽考相報各平安

詠史

二一首

章煥文

兩疏誠善懷完壁歸山丘隆賜極褒寵眷渥無前儔祖
帳東都門車馬塞道周歸來聚鄉族尊俎日優悠傷哉

鼂少傅冤憤悲千秋

猗歟嚴陵氏垂釣富春間譚笑萬乘尊偃蹇抱志還何
如王良輩屑屑風塵顏至今桐江波清風猶激顏

石屋

林大同

虛岳宛如室空洞神仙宅既非巨竇剖何勞五丁鑿間
門鎖薜蘿寒煙縈翠幙疑通少室山或與紅塵隔具瞻
同廣厦生民誠可託大庇安如山何愁風雨作

拂水岳

西岳青插天飛泉遠相繆南風怒披拂激石使倒流出
峽垂白虹晴雨珠璣浮餘波落青澗含潤滋林丘沛澤

嗟未廣素志當何鼎安得從飛龍爲霖遍九洲

七星檜

施顯

琳宮檜森森繆枝鬱蒼翠植樹映斗宿數列三之四龍
鱗綴苔圓香葉凝煙細節操歷半霜大材難小試匠石
偶來見錯愕相驚視

題興隆衛分司壁

吳訥

予住貴州十五閱月方面官相見唯一茶而已雖慶
節及迎接 詔勅未嘗與同酒食暨得代歸當日晚
行至龍里驛蘇都指揮寶令其弟以象牙器物來餽
予麾斥而去又三日至清平衛則都司李政又令其

子以駝駝牙笏等物同吾鄉人陸本中來送力辭弗
已欲執送官始匍匐走歸烏乎予之不能取信于人
也有是哉明日至興隆將出貴州境遂題一詩于分
司東壁以寓意云

爲士尚清白猶女守潔貞纖介苟一渝他美奚足稱所
以古賢達千載存餘馨莫夜畏四知嘉言炳汗青曰予
本賤士皇恩寄澄清出按西南疆習俗貪以爭乘法去
宿弊中諭安疲氓禁絕宴好私弗與通人情庶幾激羣
職相勉據忠誠瓜期欣得代星言遂晨征行囊半書冊
歸袂清風生峻詞却餞送恐汚清白名節義泰山重貨

海虞雜詠
賄鴻毛輕題詩寄倦倦勿謂予言矜

海虞雜詠

常熟爲蘇屬邑舊名海虞又曰南沙邑城在郡治北
百里舊志所載古蹟歲遠多就湮沒予爲邑人每于
經行瞻眺之際未嘗不徘徊而增慨也暇日遂采其
蹟之存著者各賦小詩以紀其實云

仲雍古墓

在虞山上

虞仲隨伯氏讓國來荆蠻放言求自廢泯迹終忘還端
委治勾吳子孫列雄藩配食至德廟壞陵寄空山樵牧
久莫禁爰瞻發長歎

子游遺址

在邑城北子游巷旁有文學橋

勾吳昔要荒俗鄙人不文叔氏豪傑士北學遊聖門身
通列四科文學冠同倫井湮宅已荒橋巷名猶存至今
里中子千載沾遺芬

齊女孤墳

吳越春秋云女歿求葬虞山北望齊國

齊景不自強涕出女於吳迨迨三千里百兩來姑蘇歿
葬虞山顛北望父母都芳魂逐飄風豔骨歸黃墟空餘
一荒坵月夜嗥飢狐

張尉舊祠

在縣學泮橋西

張顛尉南沙清狂隘當世三孟艸聖傳筆走龍蛇勢散

髮醉濡墨揮灑誇神異至今媚學子千載仰雄製儒官
歲祀餘餘瀝尚沾祀

歲音闡備也

昭明書臺

在虞山西麓

蕭統梁帝子建國居江東何年築層臺讀書此山中崇
址俯重岳傑構凌危峰歲久人去遠白雲掩遺封惟存
文選編名世流無窮

仙翁丹井

在致道觀按志瀆井得石合啟之丹化
雙鶴入尚湖內

九轉煉神丹丹成諒非易玉匣深井中藏之有深意彼
哉何人斯盜啓玄命秘鶴飛尚湖中煜煜神光紅茫茫
杳難稽漫吟紀奇蹤

虞山秀色

按志虞仲葬是山故曰虞山

山名自虞仲邑城據其東根盤二十里天矯如游龍南
峰瞰重湖湖影涵空濛北嶺氣盤礴深窈多奇蹤何當
脫塵羈滅景居山中

鑊城故蹟

在城南十里按志吳鑊鄒鑄劍處有
鑊鄒廟

吳人鑄劍處荒城俯湖濱殘鑛百煉餘城畔今猶存龜
文與縵理騰光動蒼旻劍可敵一人焉能建奇勳咄哉
彼何愚劍成終殺身

七絃琴水

在邑城南

虞城枕山麓七水流如絃昔人肇嘉名千古稱琴川猗

予少年日讀書任川邊每得琴中趣不假絲桐傳此意
常自知嘿嘿無與言

七星古檜

在致道觀梁天監中種

僊壇有古檜森列同七星云是梁時種古怪如龍形凍
鮮護朽骨新枝復青青造化呈奇觀拱衛煩山靈誰哉
若此樹閱世踰千齡

晴岳拂水

在虞山西嶺有拂水禪院

懸崖瀉飛瀑奔流不復歸南風忽吹起散若珠簾飛寒
光眩吟哢晴雨沾人衣登臨一延佇兩足暫忘疲時來
坐岳石獨有招提客

破山廢刹

在虞山北嶺按志神闕衝破崖石寺有唐常少府題詩

老龍逞餘怒奮觸蒼崖裂崖邊古佛祠年深亦消歇陰
房燐火青曲竇泉聲咽客游縱奇討摩挲看遺碣朗吟
常建詩清風滿林樾

題水仙卷

章儀

盈盈水上步皎皎金蟬窟娟娟翠羅帶玉佩固芳結夕
吹蕩香裙寒波捲塵襪無因感洛賦夢散畱金玦幻作
斷腸花相思楚江越

題合江亭

章律

蒸湘兩江水會合山之厓先賢適游覽謂此一郡佳結

亭在其巔眺望開襟懷東岳竦晴翠西谿渺無涯衡岳
雄南鎮諸峯遠若排品題播珠玉石刻多幽埋前脩與
今哲尚友皆吾儕登臨諒非偶然與賢守偕詩酒頻
和回首月殘街

古意

陳符

鸞鷲生丹穴五彩炫朝日高栖碧梧枝所餐唯竹實來
儀覽德輝和鳴協宮律安知野田雀啾啾翳蓬華一啄
恒四顧羣飛畏羅罽物類有如此高卑夔殊絕真宰意
茫茫此理誰能詰

感懷

長歎靡終極顯晦亦有由名都佳麗地甲第羅公侯雞
鳴闐闐啟冠蓋何綢繆簪蟬耀朝日劍珮鳴琅球獻替
納規諫經濟資謀猷明良千載遇治化弘天休亦有韋
布士棲遲老林丘躬耕樂堯舜好道希孔周樗散甘棄
置撫已何怨尤寤達固其然卒歲寧他求

秋日感懷

二首

高旻朗且澈顥氣澄游氛郊原淨如洗連岑露嶙峋遠
樹聳疎榦清陂見織鱗端居無與娛披衣適南村故人
具雞黍列坐罕雜賓俯仰感時序濁醪勸深尊依依笑
相語耕穫良已勤西疇多黍稌豐登及茲辰樂歲幸克

足驪聲溢北鄰此外不願餘聊爲耕鑿民
漫漫秋夜長皎皎明月光玉衡指西壁白露凝爲霜南
鄰搗衣急砧聲激清商行子久于役漂泊天一方九月
未授衣邊城益淒涼迢迢萬里隔欲寄無與將胡雁飛
且鳴音書亦茫茫深閨積愁思竟夕徒彷徨起步悼孤
影無言淚淋浪焉能有羽翼奮飛來子旁

閒居述懷

卜居長林曲結構回塘均開徑臨側岸菑畚關陽郊門
有漁樵躅境無輪鞅囂來弊刈脩穗嘉穀抽新苗歲功
旣云始耒耜亦已操鮮飈吹自南襟懷舒鬱陶膏澤降

原隰華滋沃蘭苕抱真愜內適遺榮謝外交輞川迹已
陳鄭谷風何高眷言懷古人豈伊歲月遙芳軌或可追
慨想同遊遨微情寄竹素冲抱申柔毫聊歌招隱篇載
詠採芝謠

和韋應物閒齋對雨詩題沈隱樵畫

齋居玩幽寂澄懷坐終朝小雨集芳樹餘花辭弱條繁
華有時歇蘭膏徒自消悠然悟元化遐想凌高飈

述意

桑琳

明月澹流輝白露肅秋令百蛩和萬竅迎風怒馳騁歆
枕不成眠安能入禪定冥思感氣機澄心覓真靜嗤彼

海虞文苑 卷之三
嘒曉徒毋勞亂人聽

擬古

李傑

迢迢崆峒山迺在天西極上有衆仙侶採芝以服食千
歲恒不歿長有好顏色我欲往從之所恨無羽翼至人
爲我言虛空渺難卽不如住家山垂老終有益肥鮮口
常甘輕煖體常適何懼牙齒疎何愁鬢毛白一日須一
醉終年娛壽域

幽谷秋蘭

代

言

山中有嘉艸托根何僻深猗猗含風露奕葉凝秋陰芳
香恒自秘歲寒抱貞心雖與蕭艾伍孤潔詎能侵類彼

隱德士岳谷常幽沉欲採結雙佩道遠勞冲襟緬懷尼
父操千載悲遺音

別意

驪駒已在門畫舫停河濱臨歧欲分袂此恨難具陳悠
悠遠行邁動隔秋與春音書每不達容顏夢中親且盡
一盃酒毋令白髮新

出塞

二首

錢詔

結髮卽從戎名落伍籍中霜卧織衣冷手裂猶彎弓力
能當一隊擬上幕府功一朝雜召募統袴俱稱雄材官
蹶張徒空有程李風塞北胡塵飛嗟誰破羶穹

六郡良家子盡從點軍行軍前競傳說主帥各擅聲誰
知長平疾猶乏品士明能畧如田任往往不署名坐令
少府嗤將門無豪英古來知已難家監何重輕

懷貞篇

錢氏

茫茫堪輿內人物總含氣稟性有純瑕人與物斯異縱
情爲禽獸惟貞乃臻懿結髮事君子中道違伉儷三男
娶未畢二女尚擇壻秋風撼庭闈中夜幾揮涕撫孤一
何辛仍歲遇災沴世業歎衰繁役苦相係寸心千憂
集一身百責隸諸兒好任俠理事少精細惟當親耆碩
討論踵前裔取友脊三益懇懇勤造詣二女毋怠閒蚤

晚習針綴消器冪酒漿揜閨治絲枲停鳳有脩篁庇戶
森月桂惟各保貞賢吾得正而斃

青陽薛氏有流于琴川者磚橋爲盛于邑稱鼎族柳
倅桑民懌持錢孺人懷貞篇示余且述所自余讀之
凜然貞義有穆姜氏之風焉孺人蓋武肅裔納土後
其支有流于蘇之破楚門者其大父曰子睿父曰默
孺人少秉淑姿聰慧過人女紅之餘尤好經史觀其
詩可見矣旣笄歸谷隱君君諱鸞字廷和蚤卒孺人
育孤理廢教以義方有三子電以詩名號虛舟爲時
推吁婦道至此可謂鮮議矣爲咏貞木篇以紀之亭
亭女貞木茺茺霜露姿中有雙栖鸞盛年倏乖離般
勤哺羣雛配匹無違時楸以三遷誨凜焉拍舟詩尚
惟穆姜氏千古稱女師鶴灘錢福題

寄王元勳秋官詩并序

集中失載

桑悅

僕與閣下雖同里閨文字之場實新相知者行蚤不

及告別心中快快途中默誦佳章深喜體格大進遠
追古人亦若易易自茲以往吾知句益艱才益窘由
艱而易由窘而富則至文矣爰成小詩一章以寫欲
言之懷言有大而非夸可與知者道云

風雅去已遠元氣日益漓漢魏頗近古古意存依希興

亾家國事一物能寄詞老杜詩中聖筆力翻天池歌行

善擒縱人言李白歌行勝杜而不允矣百世師獨于托

物處意淺言支離如迨迨牽牛星一章喻君臣之不會

而不能隨手拈着即寄無窮之思僕嘗與閣下言杜古詩不及漢魏為此也詩道隨世降高

賢不能追昌黎煦其脉諸琴操得安石存其皮如雲之

詩廢存古意胡元張楊輩思廉廉夫文彩光陸離終篇無真語衣

錦銜小兒今詩益浮靡柳絮因風吹但求語言麗豈識

體格卑日醉不復覺酸窮晚唐醜辭長意先竭詩外更

無詩回頭視老杜混沌初分時王君金閨彥與我新相

知平生好吟咏萬象生肝脾傾心聽吾語即日謝旁岐

渥注雲氣合閃出千里姿請掃陳隋蕪剖破商周籬造

化一入手屈宋堪鞭笞立言苟垂世勿惜時輩嗤

屈原離騷得變風雅之旨三百篇後實可為詩之祖

漢魏諸詩人得其比興之意各自成家唐杜子美雖

于比興處不能觸着撞着即能寄意然其歌行妙絕

今古又能自爲之祖至宋蘇黃披李杜之裘乘曹劉
之馬豪俠于千古之間觀其規模氣象終不出杜之
規矩及寫至達死生同去就處又前人所無亦能自
爲之祖然自風雅以至離騷離騷以至老杜老杜以
至蘇黃驗其體格之厚薄則風氣之日降可知矣邵
子云刪後無詩夫詩不在乎人則在于天地之間不
過隨日月之往來與雲霞之舒卷而已人參天地而
生不可求而得之乎知天地之一氣則自吾之身以
至風雅之始祖皆可復也烏乎豈易言哉閣下有志
復古敢進此語

感懷 三首

我思翟公門冷落休張羅客去復還來雀意良足多朝
朝蒼梧雲日日洞庭波豪勢却無恒夢覺將如何
逝日不可追誰能駐光景春陽媚花艸荏苒歲華冷玄
鳳德未成颯下丹山頂路逢清冷泉徘徊照孤影
東園有奇花容姿鮮灼灼雖是春風開亦是春風落甘
霖被郊原蔓艸輕蘭葯所以高岡松無言樹寥廓

都下送楊弘載還琴川 時下第

黃塵逢烈風飄飄無定期世事一戲劇造化真小兒春
開數家杏盡發楊柳枝長條幾千樹多折贈別離君去

六月息海運當有時我出爲稻梁可免羅網羈空谷久
無人恐有百尺枝翹望西山岑鬱鬱增忸怩

題菊亭卷

周木

行役久已矣澹無塵慮牽種菊茆亭下抱甕時灌泉花
開風露秋晨起挹芳鮮把酒共日莫南山復悠然

彌勒州用少陵韻

陳察

客來極邊夷山行鮮平地悠悠蜀道難忽忽日南至

徐云

起四句明白辛苦誰不知丈夫自無淚遐方思美人仰

爽愷可喜
屋獨欹欻願分九天澤還使羣生遂明晨又陟岷月窗
能假寐

贈南大司寇周貞庵

吳寅

殘雪積危嶺輕煙起高林春寒客袂薄躍馬都城陰送
公三千里携我一曲琴揮灑臨風意豈無鸞鳳音稱功
上麟閣下澤期爲霖我調轉蕭瑟雅曲寫素心長江一
片月山高與水深江帆走飛駛江鳥落孤岑人月兩相
照願公一開襟春船載美酒對月還微吟南轅還返北
古道重相尋三月鄉關信一函抵千金囊琴挂床壁知
音須盍簪朱絃理疏越還待我公臨

涉園

丙子正月十三日

王授

日涉東西園樂意隨春長梅花暗香雪風細月復朗林

亭晚夏幽山鳥時一響地僻寡朋從興至每獨逞平生
疾病淹乃得脫塵鞅著我丘壑間乾坤任頽仰

溪堂晚秋宴集限韻呈雪坡先生

涉江採芙蓉碧水蕩輕縈日夕羅衣單露下秋逾爽天
空飛鳥盡雲歛水亭敞山色墮瑯闌溪光動朱網故人
能愛我百里重來訪江干駐清節長虹落書幌夜久獨
吟嘯天風吹月上

遊俠篇

徐禎卿

四牡飭朱軒俠氣何翩翩夕鶩邛郫道朝馳函谷關千
金飾冠劍寶服芳且鮮徒御若雲浮周道且如弦堂甲

養歿士被服皆珠統櫪馬馱梁肉貝甲委如山片言傾
五嶽萬乘慕其賢諸侯奉白璧爲壽卮酒前合從連趙
魏駕轂出齊燕仗劍歸質子矯節奪兵權皦皦日中議
軌血重一言雞鳴脫虎口狗盜乃獲全天地相盪蝕四
汙如沸淵憑軾一抵掌解紛譁笑間縱橫負奇節逸氣
蓋八埏慨慷功名會何言七尺捐策勲山河溢流光竹
帛鐫何以坎壈士撫劍獨長歎

結客少年場行

驪馬宰青絲閭里爭耀馳朝遊吳姬肆莫入屠沽兒袖
中挾匕首跨下黃金鎚然諾盃酒間泰山心不移東市

殺怨吏西市什讎尸裂毗白日變英風拉如摧突過銅
龍門電影忽如遺司隸徒斂手行人莫敢窺橫行三輔
間法令不得施壯義冠千古雄聲流四垂

少年行

生長在邊城騎射有聲名召募河源去長屯都護營登
山望敵氣間道擊胡兵十決推雄戰連呼拔虜旌雲中
息刁斗天上掃撓槍坐美胡笳月梅花隴水清

古意二首贈劉子

空爲郢中客不見郢中吟美人高堂上自奏山水音帝
子葬何處瀟湘雲正深寂寥誰共賞江上獨傷心

楚妃一失寵獨宿楚江陰雖念容華落終憐縫繡心聞
說章臺畔畋游歡自淫今日宮中事不言讒妬深
各賦隱士得魏仲先贈金陵顧徵士

何處蓬山宅汾陰傍漢宮冥棲紫芝客長嘯綠雲中忽
佇甘泉駕遙尋河上公玄風那可撥大道本難窮夫子
金陵隱心將靜者同璫枝無以獻歌此寄喬嵩

效庾信作

綺梁文桂刻椒壁石脂漫鏡床雕孔雀窗箔織青鸞斜
牖銀河轉空庭白露團梨花初浴霧竹影尚低寒不知
紈帳裏誰復夢懷蘭

贈內

媿乏梁生操能吟白氏詩塵埃勞浣褐燈火共舖糜夜
箔雙斜縷春梳滿面絲青山堪結隱併子負心期

逢錢水部

仙侶維舟處蘆洲曉浪生疎煙過柳色細雨出鶯聲邈
我冥心契重君携手情蕭條尊酒盡芳艸又孤征

畱別都城諸同志

獻歲芳景滋湛湛江水碧白芷被洲生柔楊陰廣場美
人蕩春思而我事行役晤賞良已違清尊坐成惜明月
懸予心青山詎能隔

南山何所有

南山何所有苾芾喬松姿根與黃泉會葉共浮雲垂青
春發芳夢霜霰鬱含滋有鳥從東來巢我西南枝金商
振高唳白雪阻光儀逶迤紫岡曲迴翔碧水湄羨彼雙
飛翼浮遙結遠思豈意洪崖子乘之去海涯青冥不可
接笙歌邈何遲雲山徒漫漫煙渚亦瀾瀾一朝凌至道
永與浮塵辭

苦寒行

凜凜朔氣運悠悠玄象馳北鄙何蕭條漠野恒凄其崇
霜依岫結峨冰憑岸滋飛砂塞門來胡馬厲長悲漂漂

密雪興霰繁雲垂窮獸啼原澤飢鳥號樹枝無衣嘆
秦風卒歲詠函詩伊予炎荒士飄飄寄邊陲風土有本
性狐貉非所宜飲漿豈執爨懷續猶抱絺處燥常畏瘍
思涼誠惡痺寄謝父與母遊子難久居

寄題瀘州韓道人霞外山居

霞嶺新刊處由來古洞天仙人煉金液蛻此百餘年其
事竟莫述丹書空秘玄忽有飛霞子誅茆卧紫煙虛府
激物滓霧根歸自然蒼龍守神室白虎伏階前遊心碧
海外高詠閬風巔孤流振往派絕理悟真詮余讀相如
賦飄飄竊暮焉欲跨青牛去思餐金屑泉至道豈虛想

銘心非薄緣瑤池應有會璫笈願相傳

贈楊生

楊工鼓琴惜時無知音者

楊儀

濯濯梧桐樹皎皎明月光幽人不能寐對理孤鳳皇高
山何峩峩流水何湯湯知音祗自適玄酒薦明堂鍾子
不可作三歎起徬徨

秋寄王授

新秋一雨過落日開岳扉山禽忽自鳴微風灑人衣有
懷王夫子藏脩絕塵機青山阻且長松煙隔霏霏願言
送從之白日事多違晴江如匹練望之將奮飛

詠史

周詩 流寓

虞卿解相印迺從魏齊匿奔迫投信陵詎意有難色慷慨出高言侯嬴特深識清風激萬古烈士仰遐式此道今已湮扼腕空歎息

鹿園懷古

吳甸邈千載鹿園空遺名落日弔遙迹野艸秋參橫霸圖宵何許慘澹浮雲生越豔蠱心臆焚哉城國傾伍員抱忠歿宇宙爲吞聲英風薄江許激浪懸不平嗟余有深慨竚立涕泗盈

與鈞玄沈仲文月下作

招尋結嘉侶散步金塘曲素月挂岳端清輝蕩遐矚婉彼同車人皎皎顏如玉瀟湘竹下唵淋漓盃中淥風流抗昔賢高騁接芳躅玄虛超象先脫畧謝羈束何時釋塵軌共賁青霞谷

秋懷

瞿景淳

秋夜不能寐起視臨軒輝明月入我懷幽恨不自持憶昨赴京洛正當月弦時月行幾圓缺我行無還期祗應清光同千里常相思何當生羽翰一舉凌雲霓

天潭谷

邵圭潔

出城歷翠微迤邐一徑繞披茸入天潭悠然結廬好薜門俯游鹿蘿徑逐飛鳥引泉疏碧池環石列蒼島高亭

蠹星際脩竹倚風表登登地覺崇望望天何杳日邊孤
塔懸海上三山小客來夜雨後人在秋雲杪茶煙已自
清花徑不須掃澗聲流淙淙岳色淨皎皎散坐托浮梁
小憇藉柔艸玄譚足舒嘯微飲亦潦倒奄焉莫晷移聞
矣塵踪少吾廬百武外煩緣日擾擾何如選幽勝薇蕨
摘可飽焚香讀道書優游以終老

錢舜臣登第歸

昔年辭所知言將適異鄉西風吹緼袍慘怛不可當豈
無桑梓念奈此骨肉傷生歿總度外而奚富貴望十載
栖黃沙不見春艸蒼一朝際天風困羽旋飛翔錦衣歸

舊山稱觴向高堂前來覲故知喜極淚滿裳緬追昔年
事若夢還若狂丈夫莫可料禍兮福所藏人生百年內
處處傀儡場所以貴達觀靜裏齊炎霜嗤彼皮相者低
昂岐路旁

道中見雪憶海邑親故

沈應魁

重陰結荒闔飄風迴虛閣連霰西南來密雪遂零落玄
海湧銀濤丹樹綴瑤萼緬想明月樓飛瓊舞羅幕物類
盡有依羈覓獨無托隆寒已增悲矧復傷離索惻愴思
遠人清夜光照灼有酒今莫同臨觴減深酌

登金山

朝陟江上山煙霞望中發江水日夕流人天坐來濶危
峰抱蒼翠倒景見澄澈洪波既浩蕩沙岸亦寥絕未窮
征帆來但見飛鳥滅浪撼千樹風濤湧萬岳月龍起曉
霧冥龍歸晚雲沒中流鼓棹歌一聲振天末

懷孫子虛

朝旭吐危堞浮雲澹長林自我違之子山川阻重深之
子建安匹英髦時所欽結髮攻文藻聲價埒南金有才
命不達流光逝駸駸伊予悵離索河梁邈徽音岐路自
南北詎云升與沉憶昔城隅別霜楓倚層岑今時此何
時朱英亂鳴琴婉孌紫山曲髣髴丹泉陰愛而不可見
耿耿念同襟惜無璠璵華寄將金石心

采桑

淼淼春江平萋萋春艸綠南陌采桑女婉孌美如玉平
明提筐出薄莫畏蠶飢攀條恨無力何樹若含啼飼蠶
恒起蚤惜景傷懷抱鸞啼花盡飛蠶眠春已老蠶絲織
未成停杼憶夫君離腸隨縷結別緒逐絲棼玉關信迨
遞錦字無由寄清霜比妾心朗月將君意夜夢到天山
依然夢裏還相思不相見零落鏡中顏

南歸道中對月

客子薄言歸扁舟期曉發春風天際來吹落燕山月人

事有悲歡清光有圓缺對此飛羽觴胡爲情千結晴波
去悠悠歸路方浩浩桂擢撥空明雲帆捲虛照強排遊
子顏慷慨起長嘯回首帝王州蒼蒼隔煙嶠

四止窩詩

有序

沈冕

僕幽棲衡門謝迹城府飯蔬飲水聊以自足暇日讀
靖節翁詩至止酒篇中曰坐止高蔭下步止葦門裏
好味止園葵大懼止稚子胡若溪氏廣其義曰坐止
高蔭下則廣厦華堂何羨焉步止葦門裏則朝市深
利何趨焉好味止于啖園葵則五鼎方丈何欲焉大
懼止于戲稚子則燕歌趙舞何樂焉在彼者難求而

在此者易爲也余因有懷其人目所居爲四止窩遂
有是作

中林獨容與坐止高蔭下涼風適爾至煩襟豁然解清
絃膝上開道書手中把馳情入極外誰是遠遊者

獨遊忘遠近步止葦門裏喧喧聲利場歛足脊所履濁
酒已在尊殘書尚攤几一鳥窗中言聽之極欣喜

野人薄口腹好味止園葵逮茲七月雨烹芼得所宜欣
然速親舊聊用薦觴卮何如廟堂肉日日茹憂危

幽居寡諧笑大懼止稚子褰衣起復踏索果了不已老
妻道吾癡訓誡及童稚不識賢與愚悠悠在天耳

海虞文苑 卷之三
三
秋夜懷友次韋蘇州韻

白露湛涼秋繁星麗天闕木末清商生素景川上發始
曉鷓鴣鳴衆芳奄已歇林栖澹孤興把酒對明月念彼
窈窕姿只尺分楚越寒蘅惜未贈歲月坐飄忽

十五學舞劍

十五學舞劍藝成氣逾高二十走燕趙揚眉謁諸侯諸
侯不用武笙琴滿高樓蹭蹬八九載四海無所投三十
蚤知機卷藝無人識螭頭銅鏽生魚皮土花蝕四十始
爲農荷耒南山側年荒豈苗歿屋破秋風入窮老抱飢
寒晏卧看松色

中秋日偕徐山人登北山天潭

張文元

清秋氣始肅逶迤陟崑谷久海谿絕踪茲遊繩曩躡攀
躋逗及徑青峰極遐目撫景閱代謝感逝澗流倏夷猶
松石間天青白日煜山家桂之樹花茸颺芬馥旅雁翔
雲空阡陌稻梁足萬物生殖滋志士每育鞠考槃思崑
棲寥廓固所欲惟君素心者幽跡冀相逐

出門題壁

金竹

羣蟻徒苦戰孤鴻自遐舉一嘯天地空何戚戚妻子雲
山千萬重瓢笠從此始寄言塵世人請顧川上水
金竹少爲諸生有聲一夕夢行山谿深處兩岸桃花

夾之中有州庵藥鑪丹竈壁間題紅日半梁僧寺晚
白雲千古洞門秋之句恍悟此前世玄脩地也從此
忽忽厭世棄妻子入終南訪道不知所終

送熊茂初再調河南戎幕

二首

趙用賢

仲冬寒氣烈蕭蕭林木虛霜霰被道路送子夷門墟夷
門古俠隱尚識侯嬴居市朝忽陵谷冠蓋多蘧蔭薄俗
委悠悠世路其何如以子含清貞駭目將睢于悵別各
千里把袂分蹶踏嫋嫋一寒騎望遠深愁予子行慕袁
盎浮沉並里閭努力苟如此豈歎相携疎
垂老宦未達躋蹬梁楚間念昔厲羽翰青雲共躋攀一

落緇磷口十年承賜環相看各自失把酒開顏顏窮冬
薊門道白雪明高山以此流水意送君何潺湲流水本
無情思君鬢成斑緜嶺有笙鶴相望嵩丘山

初夏齋中述懷

二首

融風拂晨霄花雨散輕馥白堤多鳴鶴東皋展種桂念
此物候移遙情軫芳淑徘徊空堂上素心媚幽獨悠然
西山雲流暉蕩岳隩物化非營營委順無不足惟以開
沉憂披襟會遐矚

青春始摧謝灌木滋繁陰落花棲艸際流鶯語深林開
窗啟玄覽獨見萬古心虛薄寡世資種種白髮侵逝水

日眇眇因之與浮沉撫晨吒往志幽思懷鳴琴飄然紫
霞思羈紱盈緇塵

檜峯詩贈李參軍

亭亭山上檜鬱鬱含竒姿孤根得所植凌寒色不移哲
士懷貞心因之托遠思結廬高峯下林莽相蔽虧蒼翠
日在眼靜嘯煩襟披放情凌霄外顧步矚五芝但保幽
獨操帝朝非繫縻毋爲桃李顏坐歎芳菲時

送顧吏部請旨南還

平生寡交游投分子獨深衆中見顏色濡足賢豪參曰
余本頑疎年鬢且復侵屢陪瑤華論相許照寸心涼風

動高闕九月燕臺陰念子重離別對酒不能斟下馬秋
庭寂城柝夜沉沉朝辭南曹寵夕返北山岑仰視明星
麗參辰竟難諶志士感夙抱嗟此賴光尋悠然梁谿下
端居杼煩襟丈夫豈遺世乘運當爲霖賞心宿有在戀
子丘中琴莫以淒涼故投賦輕千金去去循階除悵望
懷良音

臺柏行爲李太史本寧賦

有序

孫七政

臺柏者前內翰翼軒李公維楨之所樹也自公尊先
考藩叅公某以三請養尊王考徵君公得休歸因樹
雙柏庭前以爲色養之娛甫七年而徵君公歿藩叅

公卽廬墓哀毀相繼以終而庭柏遂枯其一先生乃
移其一于新居以識不忘先孝且乞言以盛傳其事
夫千古而上自王褒攀柏悲號之後僅見于此昔聞
蓼莪廢詠今見蓼莪興篇

築臺古城曲臺上柏扶疎美人何眷眷日夕爲踟躕匪
無南山橋知是誰家墟匪無北山梓年歲久模糊此柏
自先人本爲色養須宛如交讓木雙雙侍庭除西枝忽
凋落應爲攀號枯東枝日榮茂儻爲瞻依敷眷彼舊廬
物移此新築居惻惻懷我心日月無停儲庭樹易拱握
心惻難暫舒矧茲凌霜操詎及百卉腴鉅才疾風颺寧
俾至性渝對此良慨慷上有夜啼烏烏啼一何切啞啞
相號呼烏啼若可絕孝慕亦可滅

四月夜池上作 二首

今夜雨露清水月亦澄輝涉逕旣趨忽循池復因依飛
花送故香密葉交新滋虛明寫積翠隱映涵雙扉卽事
累多遣揆物情寡違逍遙無皆是交喪有俱非緬想蘭
桂檝已製荷芰衣愛茲首夏月清和接芬非賞會企同
趣沉吟理孤棲冀得霞上作終忘丘中機徘徊更延眺
緩帶晞涼吹

愛此池上景逍遙弄清輝涼月吐明魄清風發微吹夜

深溢彩豔霧爽夏霏微照我南枝樹宿羽驚高棲噉噉
揚好音尚爾懷春思如何幽人意聞此忽多違爲念良
時屆悠悠四運移漸見衰素被苦乏還丹資滄洲有真
趣往沂非沿洄

古意贈花園主人

華君松麓

五湖一隱淪終年抱幽獨登高矚遐荒雲海何翻覆朝
榮薄高霞夕悴殞深谷金谷忽凋零河陽遂飄泊奈何
駒過隙空花苦相逐胡不訊丹丘瑤圃訪靈族徒却瓊
瑤枝旁我煙霞屋三花少室胤四照鵲山無迎春旣多
品欵冬復殷屬豈無密雪零寒花繡如簇自駐長春輝

焉識流光速雖謝向禽遊三徑自棲宿雖乏石家珠芳
非自芬郁一觴日陶寫萬事付冥莫不羨東華塵聊散
北窗目嗟嗟灌園者漢陰有高躅

秋霽後與武林俞子登高

登高一縱覽山閣秋雲飛山川霽色好爽氣浮林扉孤
帆迥天際陽鳥隨寒輝肅肅四郊內卉物具云腴激運
無違候流光鮮停機飛觴蕩羈束不使中腸違石髓薦
春釀岳花照秋衣玄覽週萬蹟神遊曠九圍逍遙暢懸
解千古冥是非

素交篇贈壽西岳秦文

有序

西岳先生挾凌雲之藻彩蔚懸河之雄思慢世率真
自方司馬上書不第人比劉蕡晚歷多岐之途益悟
達生之旨恂哉曠士之高節也茲先生壽屆七十孝
甫賢甥爲敦女蘿之懽欲致喬松之祝乞言於余余
向也十年不就茲則援筆立成迺知詩本情合雖金
蘭之素感句得神來儻靈瑞之開先千週甲子今日
古希仲月韶華茲辰讌喜中有天台賦客指春色以
稱觴但看千樹桃花卽是萬年靈藥其詩云

交道古所難意豁卽投遇况此鶴髮翁密燕散舊故憶
昔俱少年高視狹章句譚天匹雕龍研籍方書蠹意欲

凌丹霄疏節薄時務晞髮扶桑枝振衣崑崙圃苦爲世
網羈且學干謁去不射董生策卽獻子雲賦十上長安
門數奇屢跼步歸來以華嶺畏途復多迂四顧褐中懷
宛然媚明璐迺知造化兒取舍精注厝奪彼艸頭塊吸
我霞表露所以達士觀遐矚有玄悟佳君晚節來虛舟
曠高度將適鷗鵬遊何惜鴟鳶怒默悟養生家坐識玄
門路羽客雖蓬壺三徑覓情素芳春爍千花觥籌日相
呼一觴旣陶然不減丹丘趣爛熳舒天歿大椿等朝莫

山行二首

偶同鹿皮翁來訪山中客春風在梅花翳然行艸澤隔

嶺松濤來空山柱孤策

悠悠山中人藹藹雲際宿曉起尋春泉梅花滿空谷山
深無行蹤邂逅千年鹿

山人招飲大石避暑

良辰策高駕邀我入雲山縱目飛霞上洗耳清風前朱
景蔭茂樹綠蘿垂寒泉黃鳥懷好音佳人思翩翩但飲
河朔酒詎識區中緣阮生慟窮途嵇子樂長年曠代奮
達節高言諒難宣欲抵重淵壁且聽嵒阿絃

二月三日同化之弟子芳遊吾谷

芳辰結勝侶嵒畔初春蘭脩竹迷崇嶺飛花映遠巒披
襟尋窈窕引筇汎汎瀾流鶯奏奇弄遊妓擁歸鞍同心
拾瑤艸屏跡投文竿貢禹千秋上空拂漢廷冠

秋日遊吾谷

白露朝爲霜秋風始淒厲客子懷征途登高寫憂思谿
谷絕氛埃河漢肅澄霽陰苔激悲響鳴蜩咽寒氣衆條
無芳柯孤鶴有哀唳肅肅歲將晏江皋戎蘭榭一覽山
川道心旌各搖曳翩翩黃鵠遊悠悠千里意眷彼中林
人贈之以幽蕙

藤谿待月

暝色煙際深寒梅斂清影幽客澹忘歸愛此山中靜深

夜開衡門峯頭月華冷感彼太古鬼常照中林景

藤谿待月

孫柚

谿上來幽人空山月未吐遙天蕩寒光流輝澹梅塢暝
破夜禽驚煙消庭樹楚起步清澗旁花枝歷堪數

冬夜不寐擬鮑明遠韻

錢審言

涼月近人白淒清無限憂濡濡寒露下耿耿明河流竚
立空對影晤言誰與儔漏長慵就枕哀雁助予愁

感遇

二首

金澄

沕穆忽推遷美豔已皓首駒影隙不留電光耀何有髮
短慮猶長百年苦未久獨醒竟無成徬徨悔止酒

蟠龍歛文彩神霧不可量騰則雲從興蟄以淵獨藏人
生特稟秀應變叅陰陽何乃久潛伏欲舉孰與揚有時
風雨作撫已徒感傷

春雪初霽從大石澗越嶺溪行

徐漢稭

婉變新陽遊惠風吹相縈洗我昭曠懷林巒盡葱蒨標
梅馥層崖積雪明紆甸極眺澄湖陰遙山更隱見澤蘭
歲欲齊溪柳媚初變落景共徘徊飛梁且登踐回羽憑
太虛泠然有深善

翫月城西精舍

久與世喧忤蕭條住西城寒風忽入樹鄰巷皆秋聲曲

沼泫花露寒山日凄清余懷旣寥廓夜氣亦澄瑩誰將
適真賞山月方孤鳴

門有車馬客行

徐培

門有車馬客何來賁窮居主人整巾屢迺入竹下廬欸
言敘朋舊十載無音書顏鬢各已蒼肝膽今何如雲林
隔朝市還能問樵漁君爲明堂棟我顧空谷禱語罷日
欲晚沽酒烹園蔬舉觴歌伐木欲別仍躊躇相顧勗令
德毋令歲月虛

車遙遙

清晨戒徒御舉案勸君飯行役將何之出門不可挽愁

煙亘廣陌別怨秋艸蔓只送車輪去不送車輪返霜風
已已肅道路日已遠深閨結幽思容鬢歲華晚

夏日林居

幽居四鄰少長夏羣木榮寂寞遠人事栖遲養吾生開
門迎郊曠遠舍流水清急雨林表來飛流濺簷楹纖絺
不受暑病去身自輕薰風入高竹滿耳琅玕鳴習靜如
有得安貧固無營薄田十餘畝子壯能力耕衰年嬾讀
書興至詩漫成何知世途險不爲塵網嬰忘機漢陰老
千載可同情

古體 四首

幽蘭何歲甦結根空谷裏石冷白雲靜金芝自相倚何
以揚奇芬嫋嫋清風起衆方競顏色春日媚桃李天秋
玉露下蕭艾一朝萎華滋殊未歇采掇俟君子

南山長松樹秀色相氤氳高枝挂孤月絕頂撐層雲寒
風颯然起萬壑驚濤聞崔嵬雪霜骨剝落莓苔紋良工
展大用楨榦屬斧斤壯哉棟梁器持以奉吾君

結交重知已久要金石堅同心復同地旦莫相周旋如
何遽乖隔一去三四年關河阻且脩引領思綿綿願因
凌風翼銜書到君前離別不足歎所勗義分全黃鳥時
出谷白雲常在天願言卒歡好歲晚莫棄捐

海鶴養六翮皎如白雪光一奮天路遠數聲煙水長鳳
凰不得臣鴻鵠相翱翔渴不飲汗瀆飢不啄稻梁弋者
何所慕翩翩白雲鄉遊神在萬里靈壽三千霜恰乘王
子晉蓬島歸蒼茫

賦得寒山轉蒼翠

邵昌鉏

幽人最愛山相對靡朝夕四時無不佳入冬更清絕潦
收碧潭鮮雨霽孤松潔丹崖淨無塵青靄時明滅高天
矗芙蓉秀色堪攬結煙霞接層城擬有神仙窟我欲往
從之脩阻不可越誰爲獨往人緬懷昔摩詰

春夜藤溪玩月

嚴澂

已醉藤谿花未卧藤谿月此夜寒梅芳清輝前林發亭
亭遠景媚寂寂暗香越懷哉鸞鶴御何所金銀闕

懷人

朝陽昇扶桑萬化被光景白露凌秋霄寒蟲自遯屏人
生各有涯視彼井上綆人生各有心視此川上嶺北雁
顧沙蹟南鱗戀淵影日莫息空林懷人徒耿耿

中峰

十日混塵蹟一日絕情垢豈不媿長往亦自欣暫有松
聲雜澗響白雲起衫袖晝掩中峰關焚香坐來久

秋日同友弟湖上

迨暇理遊策東南屬良時雷電巖巒翠浮沉沉浦綠滋寒
幹動霜勁暄榮曜陽姿邇逗之戀芳采遐覲矚晴熹繹彼
伐木詠諷此常棣辭親故且公不遠有酒相招携蘭榭旣
前渚芑屐亦丹梯煙沉匪凌險雲陟豈履危悠悠區中
務得性欣在茲

集朱汝脩齋賦得明月照積雪

集霰綴瓊宇晴鬼射瑤砌入戶有流彩窮目無纖翳輝
素相映發晶瑩澈圖史犯斗乘槎非凌波弄珠是映讀
何爲者僵卧亦徒爾深坐白玉堂疊觥傾犀兕梁園跡
已陳陳宮竟何似懷哉蓬壺遊朝澈者誰子

過濠上

陳禹謨

南華吐高論大氏多寄托寓言在濠上襟懷何灑落直
與天者游萬物共寥廓夢蝶儼蝶翩觀魚知魚樂魚樂
不在藻我樂不在濠心會物親人悠然解天歿茲來自
濠梁試與漆園商曠懷既齊物人我正頡頏何云子非
我我相似未忘宣尼歎逝川冥心合自然若將濠上擬
終未脫言筌

閨思

二首

青陽倏已度朱夏夏若爲遲君君不至憶君君不知枕
簟嗟徒拭膏沐爲誰施

太清虛夕照雙燕繞曲房尤憎合歡艸偏向別時芳輕
風動羅幙恍疑君在旁

贈邵麟武南還

二首

瞿汝稷

麟臺收席珍名瑜萃公車荃挾龍輔奇匿耀旋海隅仙
室豈不榮紆邑懷倚閭與吾擁華軒寧歸依彩輿

天地一蘧廬况復六尺身外物徒龍夔盲聵互芸芸荃
將窺鴻濛鼓楫問玄津澡雪咸池中翱翔凌紫氛肯與
蜩鷓輩啁啾共晨昏

神虬不深潛寧奮雷雨奇威鳳不有伏六像將見淄君
子豈忘世飛躍自有時高君切雲冠繡君丹豹履坐避

曲木陰渴飲玉潢水會見承明廬荃聲滿人耳

題嚴道澈州亭

斧藻世滋甚君方貴自然結茆西嶺下意得耳目捐樹
植循故列構締僅數椽名花却沁苑奇石謝平泉長松
時起濤脩竹淨含煙巘嶸隨指顧雲霞日周旋野鳥發
新笑間關淑景妍林芳不知名雜亂當戶鮮把酒蒼翠
滿橫琴山水傳無慕一身外寧論千載前與君但携手
卽是羲皇年

從高梁橋至龍廟

鷗鷺何間間芳樹青不極晴嵐落環洲寒流間田陌澄

湖夏沆漭獨涵古寺碧微風動漣漪清輝出衣舄

玉泉山

流泉吐壑竇演漾度蘿徑林籟苔幽響品出雲浴鮮影霧
洞仙人居仙去石床冷匡坐對一泓寥寥萬慮屏彷彿
黃眉翁授我芙蓉鼎藥珠不可聞潺湲入清聽

源頭

倒影上層巒亂石下清瀨藹藹榆栝間悠悠與心會雲
卧深崖側枕影俯空翠

卧佛寺娑羅樹下

卧佛寧復起娑羅翠堪挹長風吹繁條若聞諸天泣津

梁豈云疲甘露時猶及日落羣動閑嘉嶺澹佇立

碧雲寺

夕披碧雲宿朝披碧雲遊精藍蔭嘉樹寶地環泉流初
涉宜覩史禽語識閻浮龍步儼垂手鸞音如唱鼎丹青
詎云假能益岳壑幽慧室憑茲啟煩林失其稠始知莊
嚴人妙運覺海舟

香山

古木何樛樛修磴羅清陰碧殿席煙霞寒池洗蓬心杳
窅轉曲廡孤軒倚嶮欹千峰薦佳氣旭日起高林秀色
不可名龍從慰幽尋

大悲閣

飛閣對崇嶺蒼翠幕庭戶欲聞海潮音傾耳竟何許白
雲宿岳幽是君真聞處

平坡寺

下峰見平坡上峰平坡隱若近尋復遠若遠顧忽近石
棧屢出沒雲嶠互却進躡境情已愜再撫慮都盡老僧
倚長松冷風起松韻稽首將有陳塔焉忘所問

宿善應寺

晨策翠微上夕息青篲裏翠微紛在矚泉聲灑盈耳疎
鐘振遠林湛然從夢起涼風來竹床斜漢落虛几詎云

今所歷獨非昨山水

游北山自天潭歷桃源五丈石龍墓

解薜偶遠遊十載違舊林幸茲還谷口秀色愜幽尋
杳躡蘿磴脩篁蔽初日峰頂弄寒潭
日爽然失轉徑
聞潺湲層壑清瀨瀉噴薄碧殿側縈紆紺園下嘉樹彌
蒙蔚蒼壁出樹杪玄石平于席枕石冷泉繞白龍去已
久秋幹紛蚍蜉森沉不可窺長夏如清秋理策登高丘
三山駕滄海蜃氣何網緼鳳芝若可采風物佳如許論
交復爾汝勿當今日晴過憂他日雨對酒但酣歌優得
超人羣君欲知黃綺試看松上雲
英英澹無意悠悠任

翔息經過漢廷時詎異商山側

雜詩

世豈棄君平君平自棄世生闕希世資詎符風牧志
濁抱義黃心賣卜城都市垂簾日脩然國爵屏其貴
年余偶乘會一麾寄江滙訟庭橫高霞質成澹無事
因之問夫子寧以章甫異廓落非所嗟沉冥有深契

發齊安偶成

黃鵠巢曾城縱羽落漢廷陽阿既易視激楚亦移聲
菊裳徒自憐金衣非世營含生各自媚誰爲願所輕
鳧鷖雜太液振鷺下昆明隨波適栖息交飛復和鳴
望望異

所歡惻愴傷我情

押我龍唇琴勿復奏龍徵要眇諧宿襟不入郢人耳念
此中徘徊抑按從下里啣嘈聚樵牧衆恆心自鄙迴軫
謝羣聽拂絃返吾始河魚云際鶴曠世尚知己

重華南狩時九有誦光格帝子望不遷蒼茫九疑碧天
地奇寥廓壘空寄大澤成毀真須臾詎云靡窮極胡爲
壘中人還競昔人跡歲月還鶉居物華美穀食夙駕非
我馳停鸞非我息去去莫天闕鷓枝運鵬翼

朝曦曜抗采芸芸懷自試世閱無涯人人秉無涯志蠶
鬣在君牧蟻慕窮愚皆樂餌止過客竹帛走蒙稚感動
日以新感動日如是英雄迭經綸亘古竟何異我行孰
爲驅乘化澹無事風日清以閒江山遮相媚一尊聊復
持翔鷗復予慰

過慧日寺遇雪浪上人贈

錢繼科

古寺晝寂寂松蘿翠欲滴清梵出虛堂林外飄仙笛客
從東方來西師會駐錫邂逅坐論空大道繇何適師言
道在性性見道非逃淨土緣俗脩覺海因迷覓不見泥
中蓮花開自成菂

贈妓效何水部體

莫出東門阪候子玉峰返古木號風寒長塘落日晚忽

聞芷佩香還訝松舟遠遠遠中流登望城上頭斷煙
息墟里宿雁響沙丘相見敘離別執手譚心憂心憂譚
不歇城上烏啼月子痛煙花沉我恨風塵汨仰天俠氣
橫援瑟商聲發商聲激且長此時夜正央三星明在柳
一燈黯在房鏡臺冷鉛粉掩袂悲彷徨彷徨向余泣哀
哀悲轉急紅顏命薄多白首嗟何及不見葑菲根棄置
伊誰拾

落日

邵鑿

萬事不相永憂來何過情落日起煙霧秋光空莫城薄
有田園業聊將身世并白髮向誰是婦與自養生

詠玉蘭

山午日光霽山夕月明皎山雪岫下積山梅屋旁繞春
風生美人皓臉發清笑錯落梅上影參差雪中耀白以
珍玉韞香以結蘭好

延陵于中甫再守郎官別于江上臨當就駕時方
莫春撫景序之方麗感同心之日暇贈以斯篇
爰寄金蘭云爾
繆希雍

春風日澹蕩送于江之湄尊酒聊斟酌江柳自垂垂拊
心及世運言念以傷悲王路日多艱哲人思見危全軀
在時賢碌碌亮難爲願子篤忠貞顛沛永弗遺年命等

駒隙毋令節義虧

富春道中瞻望子陵釣磯

子陵本龍德精光久云韜世祖固俊令狂奴亦人豪不
屑軒冕榮萬乘徒勤勞卓哉巢許流嘉遯在林皋一往
不可拔乾初合所遭清風激木葉詎止漢代高煙霞掩
富春江水何滔滔日月自居諸片石絕塵囂

覽古

有序

徐待聘

自上開躁進之門而後下工媿趨之態蓋舉世相諂
以成俗非一日矣故輪蓋成陰必非夷惠之室而苞
苴載路多投張霍之門風靡波流星奔雲附飛沉由

其指顧霜露決於片言或先戚而後疏或今揚而昔
抑或名收而實棄或心是而面非指韋僂辟者目之
爲通才奉法循理者嗤之爲拙宦孟門未足喻其險
蹊壑不能滿其貪苟非借齒牙攀鱗翼締恩狎結綢
繆而有脫跡污泥之中高步青雲之上者乎非韶武
而奏桑間無龍車而厠裸壤前鑿不遠後轍相尋斯
志士爲之撫膺而直道從茲掃地也丁未春兀坐小
窗徘徊永晝偶檢世說得數則非獨當於余心抑亦
有關時事者輒托楮墨以寄慨慕

士故各有志大端出與處咄咄嚴子陵超然絕塵滓披

海虞文苑 卷之三
表六月中垂釣富春涖彼其視文叔同學故人爾卽云
勞物色詎肯相爲理唐堯自則天巢父自洗耳以足加
帝腹狂奴態如此千古一客星惆悵肉食鄙

士蔚天下士弱冠爲虞令不善事上官頗著循良政太
守乃裁之豈其賤方正積憤道難容投憤氣何勁志且
眇三公而况百里命嗟彼當塗人毋令勢太橫脩眉未
云工強項安足病慷慨拂衣去奇節遠輝映

人生在三節君臣以義與質委分無逃交絕身可去我
思向茂伯報劉其殆庶當劉守郡時情誼中道沮公錯
須理遣庭辱豈恩御退人墜諸淵拊心痛誰語結綬異
曩晨連袂同朝著侍中爵雖尊黃門衷不如奉詔敦新
好積怨慚舊楚幸不爲戎首雅道猶堪舉

噴之令丹徒一旦屬之吏自陳見天子有罪請就治舉
世喜夤緣孰誰畏公議日作長安書相金馳驛使雉守
沉下僚蟻附獵高位臣惟以清故不能厚問遺毀言浸
以聞要人爲之崇舉首四面指赤衣郎皆是羔羊節漸
微苞苴風漸熾寒暄旣殊途是非因倒置俯仰今昔間
隱憫我心悸何以訓下廉當從輦上始

五柳先生者委懷離世塵作令八十日解職歸田園
切 跡寄柴桑里自謂羲皇人以耕而易食以酒而養真

海虞文苑 卷之三
以乞而混俗以傲而全身籃輦從所之白衣時相親三
徑雖就荒寸管握奇珍昨非今始是沉冥道不貧
扇令多墨政借譽在行賂白晝攫市金昏夜投當路山
公爲吏部望影亦先赴受絲欲混跡懸梁表貞情及毅
案驗時封印宛如故此雖盛德事恐爲瓜李誤方令有
私交却之乃公惡黜陟在寸握升沉由指顧獎恬廉以
勸抑競貪斯懼庶幾楊夫子四知有餘慕

題又玄道丈餘適棋

金定樂

人生事佔俾所志在寥廓雲霄一垂翅侘傺守窮約夫
君抱遠識不受世網縛蟬翼視浮榮鴻冥恣遐託經營
一畝官曲折面丹壑風翻岐伯書花覆倉公藥睠茲林
巒秀選勝架茵閣輕霞冒高棟餘翠上疎箔隱几俯岳
城春湖盪西郭山巒隔塢吟水鳥當窗落不踰闌闔間
具足仁智樂

湖上謁邵文遠先生祠

孫森

西嶺縈霧氛前溪酌玄顛中有先民祠芳華茂遺州彩
筆驅中原脩途鬱奇抱咄咄啟後賢奕奕懷世寶俎豆
永不違千秋托同好

曉發句曲尋山

驅車葛公里喜此晨光奕幽禽夫清輝稚子戲晴陌前

路青芙蓉舉目何歷歷未蒙東華塵聊縱北山適鳥道
披雲封龍宮漱寒液恍惚天鷄鳴諒有仙人宅勾漏遺
丹砂茅君鍊精鬼瑤州紛威甦霧源漾鮮碧只尺桑麻
間而與畏途隔人生在大冶百歲等駒隙赤松有高風
黃石已役役身世久已違圭纓亦何益願結麋鹿羣蚤
動煙霞屐

逢越西諸君湖上集賦贈二首

錢希言

李樹生桃旁不啻同根株女蘿寄前絲緣蔓豈相殊昔
與二三子風雲邈異趨本無隔山要安得攜手俱邂逅
此嘉會脫轍城南隅相呼各問名情好在須臾慷慨陳

千秋要余以良圖徘徊對落日吐納皆紛敷請解囊中
琴奉君清燕娛人生意氣重所樂非同襦

西越山水地嘉麗昔嘗聞連峰挺嶒嶸疊嶂披氤氳我
來秋戒莫木葉已紛紛良友盛招攜張筵湖之濱水鮮
雪鯉鱠陸俎羹羊臠果傳金子橘蔬煮碧絲芹日晏爵
闌干列炬爛如雲上賓旣譚道公子亦論文四座靡不
歡齊聲美同羣願言良晤數抒藻代蘭芬

貽別龔子

周齊金

南國有貧士一病三十春終歲無粒食身與死爲鄰孤
雲渺何托枯條不再新奄忽待物化誰能知苦辛

海虞文苑卷之三
題味菜軒卷

釋慧秀

鵝雛念竹實鴟梟嗜腐鼠神駒慕水艸所樂非棗脯人
生各有適何必盡鼎俎夜鯉與晨鳧傷哉物命苦我刈
園中葵噉之味如乳霏微搖曙煙霖霖霑春雨戎戎綠
甲新栩栩黃蝶舞剪此偕故人可以酌我醕脫粟資饗
殮卒歲安所人不羨五侯鯖不願八珍釜至足憺無營
庶幾延薄祜

海虞文苑卷之四

邑後學張應遴選卿甫輯

七言古

種桃

張著

崑崙潑翠瑤池綠老樹蟠蚪噴紅玉秋風青鳥西飛來
劉郎唾核漫岳谷碧瓊仙種叅差分鳥金小鑿劬春雲
雲根雨潤土膏暖枝頭一夜花開滿種桃仙客猶未歸
紅雨紛紛已驚眼武陵洞口天台前玄都道士緱嶺仙
瑤笙醉吹綺霞熱相逢一笑三千年

淮河水次金別駕韻

淮水何茫茫水寒沙艸黃淮山何莽莽山暝寒煙蒼淮
南淮北道路長行人過淮心慘傷夜深酒醒淮船裏愁
看月照淮河水

長干行

妾家長干橋妾食長干水十五能采蓮十八嫁鄰里郎
行西江久不歸言情怕見鴛鴦飛白蘋洲深少蓮葉南
風吹波蕩舟楫大姑小姑兩嬌癡日莫當門笑相接今
年蓮子稀采蓮歸較遲妾心比蓮葯妾命如藕絲藕絲
不斷蓮心苦滄江日日愁煙雨郎不歸妾誰主

關山月

林大同

關山月白如玉盤海底飛上青雲端煙消霧斂清輝發
今夜鄜州誰共看言情問明月胡爲有圓缺人生亦如
此十年九離別嫦娥孤眠白瑤闕桂子吹香心欲絕歸
期恰近中秋節與君醉吸盃中月

題虞山丹房圖

吳訥

虞山高哉幾千尺屹立巍巍倚空碧中有山人號中陽
燒丹避世全形蹟晴空煜煜丹光浮丹房正對西湖頭
平波浩浩涵倒影窮岳拂拂飛晴流尋真每入雲深去
聯絡煙蘿繞瓊樹丹砂石髓藏深崖瑤艸琪花滿幽路
天梯隱隱重復重危梁駕水如長虹松扉敲月訪仙友

禪房啜茗譚真空時平歸隱人孰擬佩玉相過動閭里
冥觀萬化同虛空放浪形骸等雲水奇哉景物幽夏妍
清詞妙畫人間傳流傳至今經幾載披圖滿目空雲煙
君不見蓬壺渺渺稱神仙古今馳慕求長年陰陽妙合
聚復散海波昔日多桑田中陽一去不復返星移物換
俱茫然獨存長松覆荒井至今夜夜聞啼鵲

贈顧義婦

錢家阿嬭心獨苦時值長郊動豺虎蒼皇奔走依所天
乖違不怕崩腸腑所天有子前室生已亦有子携同行
意度二雛難兩挈棄已留前能割情江清海晏歸來日
艸際哀號覓兒骨婦人見義却如斯翻笑男兒爲不得
蒼天維高還匪高後報阿嬭雙鳳毛雖云天朝來旌異
太史作傳先榮褒烏乎太史作傳先榮褒

題青山白雲圖

陳符

青山萬疊高嵯峨白雲縹緲生岵阿須臾變幻林壑隱
羣峰矗矗浮青螺飛泉幾道垂素練觸石穿林時隱見
縈迴百折走長溪溶溶流出桃花片洞口茆堂半掩扉
蒼苔路滑人蹤稀鈎簾有客坐清晝坐看白雲行翠微
石壁天池幾千丈紫芝瑤艸年年長跨鶴仙人去不還
看棋樵子時來往雲山吞吐態莫窮良工運意摹寫同

雁宕天台足奇趣爲君移入高堂中
蹇予愛山久成癖對此令人三歎息
山中仙子或可招同駕白雲遊八極

題杜用嘉延緣亭

少陵孫子清如玉家住吳城樂幽獨
圖書萬卷窮冥搜詩法千年遠相續
有園不栽桃與李三徑縈紆陰梧竹
芴亭結構幽且深青苔日厚無塵俗
翠雲靄靄宿簷端蒼雪紛紛滌煩燠
騷人逸士時直造譚笑生風清可掬
月明松影落琴尊日暖芸香散篇軸
先生自得靜中趣世態浮華懶徵逐
閉戶著書終歲年湖海詩名自芬郁
何當買地結束鄰日日相過借書讀

迎翠軒

吳城西去千山疊秀色凌空何岌業
雨過羣峯翠欲流明湖碧障光相接
幽軒卜築城之隈綠窗還對青山開
卷簾飛瀑落書幌排闥煙霞浮酒盃
軒中之人甚蕭灑寄傲林泉趣閒雅
雲山終日相主賓詩酒忘形共陶寫
松陰滿庭生夏寒竹床湘簟鋪琅玕
北窗一枕清晝永醉鄉茫茫天地寬
世上浮名空碌碌羨君樂閒心自足
信知城市有山林何必移家隱盤谷

合江亭作

呂因

蒸湘二水西南來奔流會合衡城隈
其中有地真異哉

藤崖石磴高澗朱陵古洞門不開浪傳仙侶曾徘徊
詩存壁刻封莓苔斯人總是瑰琦才五言氣格尤崢嶸
乃是吏部韓公裁江亭從此開八垓紛紛遊客常追陪
倚闌下瞰身欲顛清湍左右無纖埃漁舟如鳧入浪堆
乘風時見征帆回雲開衡岳青崔嵬洞前水漲浮新醅
岳花未發宿雨催地窄不容猿嘯哀

題畫

桑琳

吳江水落秋容蚤茱萸結子蓼花老菱歌聲歇采蓮舟
十里銀塘鏡光曉翠旗閃斷鯉魚尾膩綠鴛紅蹟如掃
天外雲開見洞庭七十二峯青不了
何處洞簫敲嫋嫋疑是黃岡老遷客載酒重來散懷抱
中流擊楫泝空明傲倪乾坤凌物表想當盤礴夜深回
白露橫空江月小

初夏江上曉望

桑瑾

東村西村鳩亂啼欲雨不雨山雲低岸柳亭亭似人立
一片青黃錦新織深村茆屋炊煙裏若個幽人眠未起

耕隱圖

陳宏

君家舊隱山之濱屋外青山山外雲朝耕不事別生計
夜歸兀兀窮典墳春風二月杏花好雨飛山谷紅紛紛
不聽輪蹄走羅博惟聞布穀啼芳春日長有客挽琴過

蒼苔自掃無纖塵澗底尋荆煮幽菽墻頭借酒呼東鄰
山窗夜雨青藜皎秋風野飯紅蓮新賢良一策笑公孫
光範三書絕相門

雲邊歌

雲之外雲之邊山人借雲名其軒遠岫推紅日初上長
空度碧人未還樹雲黯霽有餘溟溪影氤氳無盡天山
人之樂不在酒在乎雲水雲山前我家虞山住一廬虞
山龍從蒼翠縣紫門入徑和雲閉竹籬夾岸和雲編窗
梅團團容月蚤砌藥欵欵經春妍坐樹綿蠻語黃鳥隔
林斷續啼玄蟬山水畱情我亦足蝸居豈是平生緣雲
邊有客長我過盛言君居如神仙湘簾晴捲莫山雨畫
橋暖接春江煙諸峯羅列森玉笋間雲縹緲斷復連君
能爲我呼嬋娟真珠夜滴槽床涎雲山舊癖一洗盡佐
我堯舜垂治千萬年

唐五王擊毬圖

東風如雪飛楊花興慶宮前春色佳五馬歸來汗成血
毬門殘照西風斜潞州別駕清瞳亮紅塵不到玉鞭上
岐薛欹傾擁袖新宋按鞚兮申擊杖馬首平原艸未枯
五花帳裏黃門扶華葦相輝彩雲遶樓中歌笑情懷好
君不見紫騮不踏擊毬場蜀道萬里看雲長

江山勝槩

長江西來如建瓴兩岸好山無盡青初來只作畫圖看
圖畫不及天生成蹇驢驅策促脩程僕夫疲倦行且停
剡舟剡棹遠相發曬網收罾趁晚晴煙消日出茆屋小
林深霧暗樓臺杳檣帆隱隱來江頭酒旗颯颯依林杪
富商大賈競棲集健途卑境追前急行人未得履坦夷
危峯倚天寒翠濕衲子緣崖結構新却將險絕誇世人
可憐大道平如砥臨風下視如輕塵爭羨張帆能利涉
出入風濤良自愜君不見江山勝槩真何如氣吞雲夢
三山低我欲乘風便飛去手弄日月崑崙西

題王舜耕山水爲王太守作

李傑

遠山蒼蒼近山綠山下溪流浸寒玉煙景溟濛畫不開
一片丹青圍霧縠連岡杳杳接孤村芳樹依依帶平麓
石崖路斷小橋通高隱誰知結茆屋居人鮮少遊人稀
頗覺幽深類盤谷王公筆跡誰能如位置彷彿高尚書
想當盤礴恣揮灑胸次直與造化俱江南風景奇絕地
隨手寫入生綃圖東萊太守好事者珍愛何啻同珊瑚
黃堂政暇時一覽恍若置身山水區我家舊在吳中住
採山釣水都成趣玉堂十載受君恩未許翩然拂衣去
松風蘿月久無緣布襪青鞋空有具還君此圖三歎吁

興在雲山最深處

西郊雪霽

朔風吹天洗空碧萬里同雲斂無蹟曉來一望白皚皚
瑤圃琪園同一色燭龍銜耀昇海東須臾大地俱消融
煙林竹樹澹明滅西山削出金芙蓉乃知陽德勝陰力
原隰青青徧牟麥于今欲識豐年祥試聽野老歌三白

送陳漢澤還會稽

會稽之山何鬱葱奇峯兀礫摩蒼空有美人兮買田卜
築于其中攀蘿月兮濯松風忽憶佳客遠在青雲上手
持如杠巨筆出入蓬萊宮駕舟歛爾上京國聚首一話

情意同留連尚未久歸思隨征鴻故山石室長苔蘚涼
飈半壁間枯桐都門牽衣話分別玉笋美酒珍珠紅此
一去何匆匆柳條無綠不堪折錦雲爛爛霜林楓長亭
短亭望望杳無際多少離思都付參差煙樹江之東

鴛湖歸興送姚主事迺尊

朝領五花誥夕買一葉舟君胡爲乎不少畱歸興發兮
鴛湖秋鴛湖之水三百頃上下天光共雲影漁人一笛
蘆花風十里垂楊煙暝暝憶昨携壺汎覽時中流蕩槳
隨所之滿船明月浩歌起玉盃行酒西家施飲酣攘袂
豪氣作似挾飛仙遊碧落而今回首疑夢中可恨風流

海虞文苑 卷之四
空寂寞仗我舊珥劍著我新錦衣帝城雖佳麗不如蚤
旋歸收拾曩時詩酒伴湖邊景物猶依依

題畫

朔風吹空作寒冽最喜朝來盈尺雪千林搖落四山空
萬樹梅花正奇絕西湖主人興味濃呼童携酒登孤蓬
恨無佳客共清賞只有雙鶴能相從冷香襲襲時拂面
翠羽啼殘人不見溪流曲處最堪憐脩竹數竿歆斷岸
風流一去三百年湖山景物還依然披圖彷彿見高致
令我嘆息懷前賢

天井洞

芙蓉峯頭石扇開神椎鑿破蒼雲堆
豁訝洞天闕元氣地底逞逞驚風雷
青葢翠蔓絡岫戶日光倒射金銀臺
玉鴉翻飛石燕舞琴床丹臼空莓苔
沉沉一穴窈莫測俯身下瞰生疑猜
仙人狡獪多幻化以此隔絕凡蹤來
其中當別有天地山水瑩淨無氛埃
絳節羽鞋紛紛婀娜閨風玄圃通
蓬萊蒙岳居士好奇者藜杖縱遊知
幾回洞口桃花自迎送洞中猿鶴相
追陪有時呼出偓佺輩携手共酌瑤
華盃長生要訣倘傳得霧境日月堪
徘徊

題夏仲昭墨竹長卷

清卿胸次多豪興落筆鋒稜何瘦勁
縱橫無數碧琅玕

揮灑俄令墨池罄開卷如坐瀟湘濱陡覺風聲滿清聽
丈夫十萬未爲雄君子六千差可並洋州太守真跡稀
吳興公子寫法奇今代清卿得其派盛名籍籍人間知
古來篆籀法中絕諸公筆力能挽之願君什襲比重寶
千古藝苑畱遺規

題戲嬰圖

深宮沉沉晝漏遲鞦韆影裏珠簾垂美人睡起薄梳洗
花庭羣聚相娛嬉掌珠顆顆蘭芽茁眉目娟娟肌玉雪
羅襦繡袂鬱金香天上麟兒總奇絕夾持如護珊瑚枝
蘭湯沃灌瓊瑤姿百玩堆床隨所取香奩珍具光陸離

婦人憐幼皆苦此哥肉恩深理宜爾螽斯蟄蟄麟振振
自昔周南王化始綠衣白華古有之陽祿柘館真堪悲
君不見趙婕妤武昭儀皇孫啄盡漢鼎移房陵廢後唐
祚危治容曼態藏禍機我題此圖憎歎歎

送楊弘載上舍還海虞

王鼎

正思尋君遊佛窟城北城南悵斷絕心靜空聞湖上波
眼障不見空山雪忽聞花開罨兩峯白白紅紅嬌勝頰
野禽喚人心欲飛陰雲遍空雙翅垂吾子何事又東返
孤帆落日春流遲神遊八極自朝莫造化小兒能我嬉
敲冰載月軒爲錢世恒賦

我昔遍舟汎吳越不衝風雨卽霏雪錢子胸萬玉壺
所遭迢迢皆奇絕誰云出門卽有礙敲冰載月與逾別
凌室清寒玉柱懸南樓笑咏蒼煙滅是時清意逼霜天
蔡州苦戰徒紛然山陰夜寒空返棹有懷不寫寧非偏
多君曠達仍守義清風盛事當兩全掀髯一笑天宇濶
長吟百韻回清川仙舟豈直載書畫從今冰月芳名傳

次韻桑廷璋弔文山手書六歌遇災詩

北風吹旄寶刀雪憤心欲飲腥胡血異哉南極妖星紫
勤王孤臣數幾歿泰山宋社漂如毫厲階誰構徽與高
憶昔符讖卜千載末路皇輿沉滄海臣忠彷徨心不平

出亾見執天雨鳴燕臺經春復秋度哀歌手筆人爭覩
骨肉摧亾此何有好事得之寧固守皇天降災奪我藏
空名亦足昭三綱

山中歌

王授

山中五月不知暑午窗夢揖巢與許起來灑灑竹風吹
滿地落花鶯自語城中酷暑金石流馳馬汗血不少休
富貴致身真自誤何如蚤向山中遊

觀舞歌

徐禎卿

今夕何夕燈滿堂金釵夜舞華瑟旁香風拍袂紅霞舉
玉腕矯矯凌虛翔飄飄雲步蕩輕珮八鸞協律鳴鏘鏘

花柔玉軟兩無力宛轉應節隨低昂蟠身蹲伏龜鶴息
延頸直時螭龍長明珠圓轉盤四角新蓮裊娜波中央
繁歌急調相迫促紫燕雙入虛簾忙粉脂凝汗朱顏發
明月空梁添素光座中豪客燕趙產快賞一舉連十觴
吳才雖不勝盃酌能握綺筆揮詞章聊寫一曲當縑素
清腕不讓湓陽郎湓陽涕泗苦不足風流詎及吳才狂
從吳學士姪奎觀模米襄陽山水圖并學士題識
昔上黃鶴樓西望襄陽堤襄陽艸樹澹於染清猿落日
令人迷歸來復見襄陽畫銀海珠源恍餘派楚山沉沉
煙霧高淋漓七澤翻波濤漁舟買船入點綴竹林楓樹
懸江臬白雲縹緲蒼梧遙旂如湘君垂旒旄我欲乘雲
向空舉拄杖呼雲雲不起山中蘿薜不可親悵望伊人
隔秋水延陵學士襄陽儔對此踟躕搔白頭碧山心期
竟已矣回首歲月成墟丘猶有篇章未磨滅教人空憶
舊風流

白紵歌 四首

三星爍爍花滿堂素腕盈盈出洞房垂羅映縠耀明妝
嗽若雲中開月光流情盼君君莫忘停歌節舞進玉觴
願君安坐夜未央

中庭桃枝連理傾璫卮合霞玉醴盈歌舞君前流目成
絲桐順耳感人情持觴把袂君不違願作梁間雙燕飛
三
旨酒千壺列東廂美人如花嬌北堂齊歌合舞聖世昌
願得歡娛永未央脂車秣馬且踟躕百年之會忽須臾
東流之水西飛鳥今我不樂何爲乎

四

魚璫膏擊素鮮金弁裁裁賓四筵趙瑟高張調蜀絃長
袖翩翩陵七盤華歌妙舞及春妍蘭苕參差桃欲燃上
天月明降醴泉皇帝陛下壽萬年

贈錢元抑題小像

錢郎毛髮鬖且鬖秀骨插鬢蒼崖開驂騮黯黯有奇氣
一蹴萬里空長挨今之畫工不可數畫馬無過曹韓正
吳生落鬼筆有神不求貌馬求貌人英物由來豈殊相
麟鳳聖賢俱絕倫却恨丹青損真趣獨事玄毫拂紈素
生象孺孺指間出大巧無乃遭神怒故人三歲不相見
開圖忽訝錢郎面小兒八歲快目睛問之啞然呼姓名
烏乎畫馬雖工只畫形風雲道路俱冥冥豈知錢郎貌
如此馮馮大腹儲滄溟高蹄昔蹶未可輕今日近前凡
馬驚吳江之滄浙之淚我行于南從此始掉頭不見眼

中人寂寞行歌向湘水

送王誕敷之官長沙

美人南往雲陽墟我欲從之道鬱紆晝夢衡峯半空紫
覺來失却巴陵湖對君把酒心茫然七十二峯猶眼前
玄猿攀蘿石壁仄黃鶴空洲芳艸連春寒風多太陰黑
瀟湘淋漓濕雲色楚宮花木啼杜鵑舟子商人淚橫臆
君欲去今可奈何側知王事難蹉跎離心不惜瑤華贈
聊爲湘纍誦九歌

送友

平原蒼蒼孟冬月行子辭燕指吳越淮水橋邊賣酒家

停車幾處梅花發羨爾侯門蚤拂衣柴桑舊里角巾歸
白酒山中新芋熟青楓江上蟹螯肥閉門松竹依然在
一曲參差醉落暉

票李貞外贈古鏡歌

關西故人惜我別贈我古鏡光如雪感君意氣特相許
爰披肝膽照清徹盪日摩空恍虛映奧室青瞳閃宵晰
妙質精凝水土深丹煙碧霧生華纈圓銘髮髻不可讀
頭屈蟲蠕細糾結腰間錦囊故所佩請脫繩絲置扁鐻
當令明月入我懷精光夜夜隨虹霓故人卓犖信才傑
蒼鋌炯炯豈相劣嗟予蓬穢何所似對此不覺心內熱

湘江溟洞入無滓衡岳凌空鬱岑巖山行應使魑魅逃
水宿能令蛟怪滅古物由來孕神秀靈光不讓三尺鐵
憐君至寶不自惜何以報之嗟非茂護藏但使鏡莫缺
與君交情世不絕

梨花吟

錢詔

春深桃李多摧殘北鄰梨花獨可看初疑飛雪著高樹
瑤光隨月侵闌干幽香細細生不斷水仙何弱梅何寒
天工巧奪并州剪足練碎剪還相攢太真空誇海棠偶
櫻桃更慚樊素口娥眉澹掃意態真俗眼知誰定妍醜
高歌豈厭呼酒頻貞姿絕俗人自親小軒午靜春風急
飄飄墜粉沾羅巾洛陽姚魏稱穠麗國破已作陌上塵
山家種梨春不極年年風雨年年新

續麗人行

桑悅

洛陽三月春無主桃花落盡清明雨名園接葉暗栖煙
可教鸞鷲無言語陌頭車騎何紛紛顧盼似空遊女羣
柔情薄射伊水月倦思怕領龍山雲就中八姨最年少
上馬臨風殊窈窕白日淒迷天暗垂萬姓遊魂隨一笑
當時宰相名國忠幾迴茲轡朝真龍綃裙六幅行委地
峽水拖入華清宮杜陵老翁慣飢餓半生只對山妻所
酸眼驚看絕世姿錯認九天玄女墮此翁向後攢百頁

潼關戰骨堆 心頭始知昔日限中見 珪釵銀匳皆干茹
君不見 魏巍文武開周國 削義降仁褒姒色 再觀青史
發長歎 丹臉雙刀古無敵

李節婦吟

遊絲墮地風不起 燈燼霏霏落江水 良人一去不可招
形忍爲人心作鬼 黃葉擁籬秋滿門 孤兒索果啼黃昏
三喪欲舉况赤手 渤海捧土成高墳 白日遲遲常不曉
薄雲飛過長空杳 夢魂沈盡水中萍 血淚滴枯庭下艸
寒冬凜冽藏春溫 有子成立孫高騫 幽閨情事動霄漢
施報默默天無言 臨變從容能就義 視死如歸生作戲
今古曾書幾丈夫 君不見李母苦節絕代無

醉鄉侯

漢家法忌侯無功 包茆之土何由封 愁陣屢把騷壇攻
爭似酒兵能折衝 百壺真主逢堯舜 齊鄭殊途悉歸順
一石八斗輸不盡 食邑河濱酒泉郡 與劇自持雙劍舞
法令森嚴吾喪我 牛飲三千供部伍 間築糟丘更開府
糶糧不治老參軍 焦革又收爲戶民 萬里拍拍江南春
把盞絕勝投筆人

風吹五色牡丹圖

一春無計消繁華 坐香傍色餐流霞 天桃濃李俱小器

海虞文苑 卷之四
指目晚看花大家疑是楊家諸姊妹五隊合來成一隊
種種顏色各自奇能與春光助明媚封姨同入東君門
明妬暗忌那敢言人處豐亨理宜戒物當盛滿愁更繁
畫工儘有無窮意展玩令人起遐思誰將此語告成王
兢兢善保雍熙治

題鯉化龍圖

江湖寄鯁登龍籍脇下赤鱗文帶黑食殘仙蓼三千斛
昨夜禹門驚霹靂將飛能化許琴高欲鬪得看惟富弼
頭中尺木長盈寸頷下明珠吞一粒騰身矯矯萬民望
吐氣茫茫四方濕注雨如車不足論溥沃焦枯見神德
深潭亦自有卧龍疎遠未蒙天帝識臨水照影空自奇
半生不得風雲力

贈陳鳳翔學博

狄雲漢

繹陽枯桐朱絲絃中含太古意萬千艸堂試鼓南風曲
乃知聖人心一天先生于此猶未足又積遺書堆滿屋
夜深月到青天來自起開門傍梅讀予嗟老病鬢若絲
琴書俱廢良可悲伏羲歸天仲尼歿此趣獨羨先生知

題贈朱母貞節

御史良王之母

朱家有母雙鬢雪蚤失良人守貞節孀居荏苒四十季
白瑩堅珉無玷缺鳳雛羽翮輝文章青年已入天門翔

煌煌豸繡炫晴晝稜稜白簡飛秋霜一門佳慶由來少
共羨哀封及旌表曉日龍章雨露新春風慈竹冰霜老
幸逢明聖扶綱常佩榮服寵誰能如子爲良臣母節婦
董狐之筆當大書君有恩浩如海母有節清不改君恩
一飯不可忘母節千秋垂耿光

太白樓歌次韻

錢仁夫

太白樓空城上頭太白去與天同遊生前醉酒不一處
此外又有黃鶴樓采石江邊一堆土北望青齊南望楚
英氣浮空結白雲似學霓裳羽衣舞一時盛事人爭傳
春花秋月年復年我來樓前一縱飲時有片月來青天

依然問月當時景不覺令人發新興揮毫聊和壁間題
肘後生風捉不定意匹經營何有勞似決泉源通運遭
金壺墨汁蘸已盡一滴不沾新製袍詩成擲筆忽長笑
不敢大言知者少樓中肖像此二人吾儕可望不可到
又

太白樓何高哉雖高不礙雲去來八窗洞達凌雲開雲
來昏黑樓不見雲去忽見樓崔嵬我初登樓訪遺跡寒
日欲落悲風催昔賢醉酒在何處但見舉目惟蒿萊只
有青山不改色冷眼看人埋沒紅塵堆人稱太白天仙
才唾視富貴如浮埃文章流落在人世果然字字皆瓊

海虞文苑 卷之四
瑰欲作狂歌招大白太白去遠招不回但見雲間有孤
鶴回翔審視欲下猶徘徊笑爾胡爲不學丁令威樓前
大呼我有酒連呼不應令人哀却輸我身正見在多活
一日多進三百盃

又

任城危樓倚天起太白胸襟亦樓似海岱羣峰忽在眼
汶泗洪流繞城址萬古乾坤一醉休樓中風月春復秋
馭風騎氣睨八極欲呼此老同遨遊

泰山五松歌

姚奎

黑龍潭中蛇母出霜鱗剝落腥雲濕珍珍長髯十兩針
挺挺直骨三千尺神霧呵護元氣鍾驅霆戰雨搖蒼空
堅剛節操振今古濫爵肯受秦王封波濤滿地陰風起
萬籟颼颼成律呂材堪柱國苦弗試蕭然遺棄空山裏
青青顏色經秋冬吞冰吐雪經磨礱工師一日如相逢
終當獻入蓬萊宮

月下琴行

楊儀

銅龍水滴春夜長明月悄悄窺西堂飲茗讀罷招鬼章
持爐添火燒沉香瑤琴脫却紫綺囊玉軫拂拭生輝光
舉手一撥生琅琅宮商角徵相低昂清如瑤臺老鶴唳
松霜和如高岡彩鳳鳴朝陽適如漁父濯足歌滄浪怨

海虞文苑 卷之四
如昭君馬上啼紅粧輕如落花飛絮春茫茫重如六丁
雷斧摧扶桑緩如漁籟細水流春塘急如狂風捲海波
濤揚情然彈罷倚繩床千思萬慮都消忘不聞人語喧
東墻滿庭簌簌飛寒霜廣寒一曲嘆已亾至今彈者怨
嵇康我今欲換流水腔知音人在天南方不如收拾天
荆旦水雲林下尋王郎

釜峰晴眺

鄧韞

踟躕木榻兩足頑家人勸翁尋好山北郊買舟得風力
瞬息送我江雲間長江東來浩潺潺釜峰扼之真抗顏
老人舉酒山作座江山閱人吾已班洪波浴日酒面殷

兒牽翁衣且莫還英雄有會天與險書生翦戎如刈菅
風波過眼誰復省斗酒盡爲江神慳我今傾瀉洗俗障
硤砢滿抱將詩刪詩成亦可付鏡石詞有設戎如銘關
可憐勝境落遼左鸞聲鶴駕安能攀江山還見此客否
白鳥一雙橫碧灣

仲秋十二日福山有神社之集予率子姪往觀之鄉
人集者數千人予與客飲于山椒風日晴和天宇清
曠狼峯了然可卽有感于壬申水村太宰以遼師平
寇事詩多及之紫琳山人識

夜夢題匡廬圖覺而成之

瞿景淳

道人愛山久成癖戶欵山光共朝夕忽辭故里來金門
夢寐時猶面蒼壁誰人貌得匡廬峯儼如石丈遙相從

海虞文苑 卷之四
蒼然正色鎮南服不與雲物爭春容
崑深谷阻誰能極
中有瀑布如垂虹
千秋噴薄不增減
霧源疑與天河通
道人對此長嘆息
山在人寰人不識
焚香默坐神獨遊
安得凌風生羽翼

閨序篇四首

周詩

惠風吹薄千林花
游鱗翔羽彌晴沙
江山色態正鮮媚
邊疆脩阻君離家
君離家行雲千里
心俱賒銀床綺幕
度清夜玉容凋悴
空鉛華雙魚錦字
遠寄將青樓泣向
天之涯

朱明景照清綺房
殷憂不覺心徬徨
思君不見見托瑤瑟
停絃忽復涕沾裳
涕沾裳蘭階寂莫
流蟾光玉關未得
封侯信燕然萬里
魂飛揚妾身願作
雙黃鵠寥寥雲海
同廻翔

緘情墮却珊瑚枝
珠簾香斷銀河遲
風前羅袂時掩泣
陽臺月色長相思
長相思關山遼絕
那復知深閨砧杵
亂秋夕枕上鴛鴦
悲獨栖心旌搖曳
不得寐起坐金窗
飛素絲

北風寂歷摧枯桑
玄陰黯黹浮川梁
交河凍合苦邊戍
空房獨宿愁思長
愁思長膏缸凝燼
寒無光煙沙綿邈
幾千里征衣攬寄
心茫茫勛名壯士
垂景鐘軒車何得

還故鄉

古檜歌并序

致道觀古檜余弱冠時從先子春谷府君西川孫翁
遊覽其間後與趙黃山鄒西井月夜登壇徘徊夜分
乃去不能無傷逝之歎孫子芳曰君神與檜遊情以
檜適悵然永歎可無賦乎時亦湯爾別去及余在崑
山舍第石谿所命酌石谿以折枝新荷爲供因思及
之遂作古檜歌寄小川兼柬子芳云

君不見虞山之麓有古檜栽培來自蕭梁世成削唯滋
日月華雄盤欲起風雷勢鼉驚鯨怒互凌遽虬突龍驤

共虧蔽霞翳雲幪赤日陰流颺激蕩失魑魅秀色千齡
靡改易清都定有神祇衛孔陵柏秦封松拔俗邀標豈
殊裔海虞泰岱邈千里會有精霧自攸契紛紛樗櫟遍
寰宇雖有鄧林亦何取古來勝槩誇江左怪絕于茲夏
誰伍登攀賢達知幾許滄海桑田總塵土何如此檜有
仙骨逍遙甲子任倫忽每逢冰雪但蒼然屈鐵虬枝轉
冥密君不見天生神物天之意徃徃神物天所秘七株
斗列千層霄四株已作龍化去迴翔寥廓幾春秋逐電
驅霖不知處吁嗟龍化竟何年令人四顧空茫然我生
夙有林壑緣探奇憇此心獨玄金宮銀榜橫紫煙芳荃

白石堪醉眠結交每作河翔飲嵇樽畢甕常流連那堪
對此艸爲別衡紀推遷無緩節已看凋落桐上華復聽
寒蟬鳴不歇景移物換須臾間悲咤因之心欲折殷勤
勸我山中人徒有離懷不可說何當遂戒江邊艫還向
瑤壇共沿越琳瑯一奏古檜歌迴薄青天萬古月遺音
激石石欲裂鬼神怖慄更欲絕馭杳億萬年歌與古檜
同不滅歌與古檜同不滅

秋風辭

嚴訥

秋空霜寒月明裏秋風蕭條中夜起城烏驚栖翻欲止
海鴻飄雲聲入耳征夫迢迢戍千里空房孤眠夜如水
夜如水心悠悠黃沙白州邊塞秋秋風日夕吹隴頭胡
兒部落爭羶裘寒衣不到征夫愁

江樓感懷

邵圭潔

去年今日上長安却指春花馬上看今年對雨栖江閣
短褐蕭條生莫寒丈夫致身須及蚤四十年過半成老
舊愁容易損朱顏新序匆忙換青艸浮生踪跡慣風波
往事籌來感慨多試問梅花開幾許且馮盃酒一高歌

明月篇

沈應魁

鳳城涼氣肅鰲殿月輪縣共愛光華麗行吟窈窕篇明
月初從海嶠迴清輝先到玉京來萬戶龍葱玄鏡曉千

門繚繞素珠開萬戶千門接雙闕燕姬趙女踏明月霓
裳舞罷綵樓嬌白紵歌從蘭路發輕盈羅襪香風起玉
腕爭妍碧霄裏雲母屏前青桂華芙蓉帳外金波水此
時御輦禁中遊銀漏三更別館秋影入瓊筵看兔走光
翻翠竿弄蟾流蟾流兔走迷煙霧仙樂喧闐見天路郁
郁璇宮綵仗闐離離繡幙飛龍度別有無限繁華客三
五良宵巡廣陌騎乘聯翩許史家盃觴接續金張宅金
張許史競奢豪畫棟朱甍連月高爐裊蕙煙薰玳瑁簾
低花影沉葡萄北市南衢行可徧妖童娼女紛相見霞
邊笑擁七香車星下羣開九華扇可憐對景歡未闌祇

惜流光宵已殘明朝月缺人事改勃鬱迴飈吹雨寒

畱別嚴內翰養齋

黃金臺前事已非古燕關外春將歸春花畱人不可住
浮雲送客空依依仗劍辭君待明發生平懷抱愁難說
拂袖朝分陌上塵行歌夜怨城頭月予還荆璞向江濱
君抱隋珠耀京闕遠道何由慰所思天涯芳杜今堪折
今堪折春日相逢又相別人間聚散無恒期憐予此去
數應奇滄江萬里淹鵬翼白日三年憶鳳池看君蚤待
明光艸予亦彈冠羨璫藻紅顏白首總相知身外浮沉
那足道綠葉歸帆細雨舟清尊寥落兩鄉愁風煙回首

傷心處天北天南易隔秋

淮上月

客從長安歸夜渡淮上月持盃向月傾清光酒中發月
是舊時光人經舊時別我今別復來淮月幾淪沒滄海
相思無盡期繁星浩蕩煙波濶但見舊月缺復圓那知
此夜圓更缺由來天上忌滿盈人世浮沉却難說君不
見昔日淮陰侯漢帝曾尋雲夢遊英氣銷沉人已老月
光長帶淮水流世間萬事亦州州買笑開顏苦不蚤百
年三萬六千朝持盃那得月長好纔過三五減容輝殘
影依然送客歸吹簫子晉今安在願逐三山鸞鶴飛

照井曲

沈冕

憶昔嫁時明鏡多清光秋波照舞雙鸞凰十年不復理
雲鬢一片黑鐵生空房桐花風吹鹿盧冷偷倚銀床照
孤影容顏衰盛未分明脉脉愁腸繞脩綬郎君終有歸
來期安得蛾眉似舊時井水唯能照妾面不照妾心終
不變

烏夜啼

姑蘇臺前春月明臺畔栖烏夜不鳴六宮沉沉鎖紅霧
君王遊樂出禁城百花洲中歡不足半夜仍歸臺上宿
綠浪迴風錦纜遲香堤濕露金蓮促翠輦行空聲殷雷

海虞文苑 卷之四
銀籠燭影動，鏤楣驚鳥飛。入人間，屋不向館娃宮裏啼。
臺傾埜艸連天去，麋鹿來遊不知處。田父翻耕出斷釵，
鳥啄珍珠上高樹。

清曉詞

蓬瀛日上迴星杓，銀浦霞輕學絳綃。龍仗鸞旌開閭闕，
仙客朝元鳴珮瑤。玉臺秦妃凌縹緲，閒弄參差碧煙曉。
複道飛闌迥入雲，俯窺塵海如卮小。青麈嗽泉春睡足，
桃花煖透胭脂肉。霧散瑣窗人莫窺，并刀剪斷湘波綠。
嬌妃催就結風裙，落花卷作碧虛雲。金宮接燕日停午，
匡首滄溟已平土。

遊客辭

姑胥城裏風光好，遊人合向姑胥老。看花不扣富豪門，
蝴蝶相隨檐上春。鑪頭少姬傾酒滿，對客數錢揚皓腕。
春花秋月不還鄉，輸盡黃金促織場。

觀拂水

奔泉赴壑勢絕雄，萬古青天飛白虹。瑤花散落幾千斛，
冰簾倒拂迴岷風。山人吟嘯泉之側，氣壓長松二千尺。
月上松梢鶴未還，碧雲散盡三台石。匡廬瀑布銀河垂，
康王水簾名亦奇。天然此派匹三絕，我欲醉和香鑪詩。

秋夜曲

海虞文苑 卷之四
山風泠泠吹北堂，蛩響四壁諧宮商。愁人不寐起徬徨，
忽爾淚下沾衣裳。美人杳隔江之汜，中心蘊結誰與語。
鴻雁不來秋夜長，河漢西流月如紙。清霜暗落芙蓉洲，
頽波逝景那能留。鳴_喘之_之死抱寒木，去燕淒涼思故樓。
翠幌愁褰看曉發，遠樹殘星半明滅。一夜相思苦未休，
角聲吹斷秦關月。

十月宿玄湖上驟聞風雨雜以浪翻木落鳧雁亂
鳴之聲不能成寐起而有作

錢籍

禹門一夜西風惡，千林木吼鳥巢落。玄湖欲立白浪翻，
鳧雁驚飛連鸛鶴。山人不寐披衣起，亟呼蒼龍治秋水。
須臾浪靜海若藏，五洲無恙鍾山紫。忽聞黑雨東南來，
山川一洗無纖埃。涓涓翠竹自青瑣，雙雙白鶴還蒼苔。
菰蒲淺瀨鷗鳧浴，十里凋荷轉香綠。晦明變幻歛忽異，
竟日臨流看不足。夜深危坐雲千頃，扃戶無言發深省。
乃知元化有深意，欲令遍識湖中景。山人氣槩吞雲夢，
曾向天庭押五鳳。風波彈壓何足論，會看消盡陰山凍。
用捨宅庵壁間韻二首

江頭吹笛蘆花白，驚起鷗鳧幾千百。有客新從天上歸，
舞袖蹁躑環堵窄。時八不識詩中豪，翻向紅顏笑二毛。
坐來霜月半輪小，氣吐虹霓萬丈高。玉川道人東欲絕，

却把茶鑪煮松雪仙人王子駕扁舟獨汎清江賣風月
少年意氣思食牛鐵心自謂同韓休仰面呵天北風熱
曹劉以下無足儔晚向天衢作天客曾說君王烹卽墨
綵筆揮成五色雲坐令天子賜顏色邇來浪迹任去畱
直與歲月爭春秋倚天長劍今猶在不斬蛟龍血尚流

又

昨夜橫飛渡甌越醉騎一片蛾眉月借得搏鵬萬里風
吹開海上三山雪玉虛真人夜半過笑捫青天一放歌
萬里銀河淨若洗恒嵩華岱森如螺客程八萬豈云渺
庭洞雲夢一盃小惟有湘江花木深紅塵隔斷令人老

百歲光陰一瞬哉何如躡足游蓬萊蓬萊美人似白玉
不妨鶴駕時時來聞說匡廬結詩社詞源三峽盃中瀉
詩成若得君王賞豈落清平三調下明朝兩腋馭天風
回首扶桑東復東頃刻銅龍報天曙一輪日照千山紅

恭題

成祖所御四馬歌

各一首

趙用賢

龍馬來翼聖主鐵蹄蹄竹批耳蹠躩翔雲螭天矯攫乳
虎當年鄭村戰其疾駛如雨朝摩九壘夜七營躡景逐
電驚神行飛箭連錢貫鳧臆血染龍花逝猶力歸來歛
控青門外天子明堂坐北極五花雲錦吹東風蒲稍徒

爲入漢宮

右題龍駒戰
鄭村霸乘此

騰星精降天房御軒后乘飛黃聖主既膺錄神馬如龍
翔追風走滅沒顧影驚驕驤靈之戰何雄武南奔百萬
若委上帝躍此馬摧中堅權奇蹴踏涸長川良工貌出
丹青中稜稜逸氣猶呼風嗟乎汗馬功勞乃若此聖子

神孫當念祖

右題黃馬戰
靈壁乘此

紫驪馬金絡月朝刷燕晡秣越渥洼奇種古難求生綃
貌得千金骨紫驪呼青海風為驅哀哉小河戰十萬俱
為魚紫驪奔足歷浮雲翻竦身企闔闔容與游天門于
金馬飽閒戰伐披圖神駿猶鬱勃吁嗟紫驪何不嘶入
落花去天子方競朽索馭

右題紫驪戰
小河乘此

駢馬黃金勒照耀桃花色鳴鞭渡白溝天池走霹靂飛
鬼一日騁千里今之此圖無乃是汗血猶憐毛骨奇龍
媒尚憶趁趨起昔時畫馬曹將軍拳毛寫出真絕倫穆
滿當年歷西極空令八駿留雄式豈如此馬乘飛龍躑
躑長鳴磧壘空白溝原頭白骨淒天陰鐵騎風雨嘶鬼
火青青血為爝豈知此馬形容在麟閣

右題赤鬼戰
白溝河乘此

緩歌行送熊茂初僉事福寧兼東吳宮諭趙憲使
二子

江水二月平江花
滿春帆消息幾時還當盃不消
離歌緩與君三十謁承明相看意氣山可傾問其何字

海虞文苑 卷之四
非楊子凌雲有賦誇長卿蛾眉入宮誨羣妬鳳皇高飛
雞鶩聚江潭一斤十餘年誰憐賈傳懷沙句風塵垂白
未逢時歷落巖嶇君亦苦去年新從蜀道回我亦返鷓
城西隈爭言白壁非懷褐共道黃金且築臺白壁黃金
空自好消人買駿何州州眼底紛紛魚目珍誰人解辨
連城寶和歌羞作酒人泣酒酣氣振髮倒立豸冠乍議
臺端雄荷衣旋擬山中緝梨花香月下長洲錢塘垂天
水拍浮毘陵城南吳子宅平生肝膽羞可折西湖地主
得趙君湖頭行春騎若雲唾壺擊墮青天月千里相思
坐超忽都亭楊柳畫絲絲行人馬首斜陽遲舉鞭揮袂
忽不見龍劍延津石幾時

薊門行送鄒吏部爾瞻請告還吉水

薊門五月飛嚴霜浮雲翳日天無光城南柳絲千萬縷
一一爲綰離人腸離人鞍馬去紛紛徒倚斜暉獨送君
心隨楊子磯邊水路指滕王閣上雲世人翻覆雲水情
肝膽向人誰可傾憶昔九關嚴虎豹與子抗疏干雷霆
我投南服裹瘡痍七年遠戍君羅施鏃骨丹心未銷血
鑠金衆口還成箕賜環乍許遊華省封章再忤忠逾耿
鳳皇臺前春艸長鳳歌且學幽人屏我行白下返郊丘
連床夜雨同孤舟涕泣空懸賈生淚江湖獨抱希文憂

我賦歸與未遂初君從幕下起徵書共道山濤能故事
繞朝拭目看公車由來絳灌怒難逢當場優笑紛誰馮
崇蘭化荃玉爲咎吞聲志士甘常窮慷慨逢人不易言
悲來相向獨相憐神武衣冠稱蚤見穆生城旦明幾先
羨君冥冥靜者心飄然高卧螺川陰少年不爲窮章句
清時豈合終山林男兒七尺萬古身莫令白髮蹉跎新
我亦名場澹蕩者拂衣且作同調人章水東流入九江
雙魚日日下潯陽明年若到匡廬訊與子峰頭問向長
春日同蕙田臺山諸丈携酒沈冲玄丹井爲作短

歌行

孫七政

臘月霰雪春未變江南春色今年晏二月東風吹不煥
桺條含綠芳艸短惟有仙家春自深梅花樹樹發深林
落英時度丹竈側飛香暗結幽人心仙家有酒春未熟
西鄰一斗勝醴醪結客攀蘿招隱來花前舉酒更相屬
君不見見商雒山中採芝叟身世悠悠名不朽函谷關頭
幾戰場白雲一片天相久又不見天台羽客若可逢桃
花千樹長春風此中瑤艸不易得餐之霞舉凌鴻濛何
爲折節摧眉在人世吞腥啄腐將何窮一盃若在手天
地皆爲空今年花既落明歲花復紅青山不誤白髮叟
紅塵可鑠黃金容君不信子晉緱山騎鶴去試聽吹笙

夜月中

靈槎篇

古虞之陽有昭明太子手植古檜七株誇絕域中僕也窮愁慨焉嘉樹遂爲著靈槎篇

君不見寰區羣木知幾許俱隨百艸凋寒雨又不聞武陵桃花長似霞空迷仙路令人嗟曾似古靈槎化作空山檜天上年年度碧潢山中歲歲看蒼翠曾隨漢使問支機不向燕昭禦魑魅已能古怪栖神明更解森沉窟靈秘借問靈槎來幾時云是梁家子晉移君不見黛色下霄赤日微陰苔藓藹封綠碑恍疑千里春雲堆却看

盤錯緣薜荔古篆煙霏半空意又似秋風滿天地春徂秋謝一枝間月桂星榆兩在躔但令歲月增幻態詎使霜霰凋靈顏信知神物多變合何爲斗牛之墟紫氣懸惜哉不向延平津于將定爲飛重淵慨予卓犖最好竒念此惻惻心爲悲昔日梁家宮苑皆如錦繁花碧樹盡參差一朝花飛碧樹空萬事東流君詎知誰有空山片月來明鏡長留仙檜懸清影古殿寒濤夜夜生空壇月色朝朝冷夜夜朝朝不記春歲歲年年度碧雲碧雲幾度鳳簫澈幾經蓬海生銀闕鳳簫銀闕總微茫回瞻濁世堪斷腸我今思隨靈槎兮適月望縱彼天路迢迢兮

任自長

干將行爲白下金山人作時山人已物故客有譚
其壯節者孤心激烈可與日月爭光僕壯夫也
冠髮盡指肝旌搖搖願爲執鞭不可得矣遂壯
命一斗酒歌之

乾坤有客何精芒艸堂夜雨飛春霜九歎笑將白雪志
片言立罄黃金裝但使不負干將意豈求俠骨千載香
可憐生長西京裏漢廷公卿孰相視心與日月爭光輝
身沒蒿萊同歿灰君不見秣陵豪貴知幾許從教百萬
誰比數曾似天邊一少微長隨銀漢寒江渚

聽查八十彈琵琶

林居散髮事幽矚戶下葵榴照人目時聞黃鳥懷好音
那許紅塵到空谷忽傳有客款荆扉雲霞猶帶薜蘿衣
手抱瑤枝道名姓使我幽人思欲飛穿花涉徑步瑤履
爲君踏破蒼苔跡主人爲煮石上泉客子爲撥鷓鴣絃
琵琶聲清激林木落盡閒花聲斷續微風隔水飄餘音
蕭蕭夏木成秋陰却令雲壑避人處轉落關山怨別心
此時颯颯幽致深空林似有人孤吟更如風泉咽危石
霜天月白烏聲鬼一曲含情已愴神曲曲關心意何極
須知曲調不虛生意氣俱從俠節成千金不惜傳一曲

特寄生平慷慨情世上知音是誰子肝膽只向冰絃傾
我今頭顱已二毛安能更把良辰拋摧眉折腰豈吾事
九天汗漫誰相邀只合携君動蘭棹處處青山響霧竅
汪司馬借劍行爲蘇季子贈并序

新都蘇季子義俠士也少年爲不義憤思血仇一人
頭四顧錯愕噫嘻曰吾何從得寶劍乎當是時乾坤
雖廣隘不重足司馬汪長公聞其事卽脫千金劍佩
之讎卽震歿蓋仇非歿劍歿司馬之高節動四國四
國壯士聞之盡裂眦欲血讎也司馬之劍術遠矣善
乎十岳王翁歌之曰俠節先聲讎自斃何須不義血

干將凜焉有國士風蓋去荆軻二千年間而復有蘇
季君汪司馬之事劍術益神予故壯其語奇其事并
爲歌之

英雄百年內常憤萬古間苦恨直節不得伸腰間寶劍
空自懸寶劍七星牛斗文祗因俠烈故隨身若令世有
不平事從教萬丈龍光賁不見張雷無道風雙飛泗水
安能制東南霧異白嶽鍾氤氳盤薄司馬公文章意氣
總絕代片言許諾生雄風自憐說劍空奇絕何如五步
卽流血生平一劍天地知上鼎國士下狗奇五十未展
封侯畧三尺安用隨身爲朝聞壯士冠髮指夜聽龍泉

海虞文苑 卷之四
鳴不已急呼壯士來佩之四國聞之盡裂皆英風折讎
讎自斃古來俠士少見此借言此劍價何許若耶已閉
湛盧去試將比却借劍心君道雌雄更誰與噫嘻乎不
獨司馬爲俠儒王翁九十劍不疎不使不義血干將田
光先生精未渝

燕京海棠歌

僕從性之聞燕京有茲花花益美南國且在空門寂
寥之境慨然感子昂荆玉篇遂爲當時從遊者賦此
薊北春光異南國御溝春半冰猶積雁盡遼天望隴梅
空逢驛使無消息偏自西郊春候蚤紅塵隔斷長安道

輦路長聞幸翠華空山別有閒花草此時遊子催愁緒
踏遍春山最深處馬首驚看芳樹枝古殿無僧花自飛
藁苔深沉春晝冷嫣然不語媚仙姿由來幽朔三千里
不見煙花解若茲可憐深谷惟鶯語黃金臺畔無人知
君不見長安花開莫春月朝霞未掃車塵咽茲花獨向
空門開落盡瑤華春寂寂好似漢家朱轂競妍華子雲
白首空騷屑

海棠花歌并序

子園池上有此花雨過爛然花開持賞命賞客有言
唐時蜀江上此花最盛者予慨然感之遂援筆賦此

吳苑柳條綠楚江春艸生名花獨未發婀娜含新情忽
遇巫山行雨度春風吹落池前樹枝頭濯錦遍新紅千
條濕着胭脂露嫣然不語媚闌干濃豔生香春晝寒乍
疑飛燕帳中舞更似西施水底看佳人不可見名花解
傾國仙姿搖曳總可憐只愁纖態嬌無力迨迨花外碧
雲斷何許關心正愁劇那堪對此倍惆悵幾度攀條不
忍摘君不見唐家天子愛楊妃萬國煙花爭自輝茲花
獨照西江水猿啼天外江流駛春錦春江日夕妍春風
總入花枝裏江花歷亂何繁華遙映當時臨砌花一從
玉笛畱遺恨江花滌澹飛朝霞悠悠俱作陽臺夢春艸

年年空自賒祗今一段銷魂意還向春風倚玉堦古來
得意皆若茲朝成綠鬢莫成絲已見蓬萊幾清淺更聞
昆明辨劫灰世間無有緜山鶴且進花前酒一卮

友松吟

陸鳳翔

山人老去遊從寡手栽松樹青山下石田茆屋歲月長
年年春雨松花香高秋霜冷松子落聲聲打石如聽樂
吳歌一闋酒觥深風濤寒澈空山陰古來隱者卧谿谷
徒友魚鰕與麋鹿况今交誼日以輕山人獨共歲寒盟

詠楊花

孫樓

隋堤堤上青春老樹樹傷春怨啼鳥落紅一夜逐東風

又見晴空柳綿攪斜翻繡幕半鈎輕細撲瑤檣一鼓小
低隨流水漾波中高入層樓舞雲表可憐紫陌豔陽時
雪花撒遍遊人道顛狂聚散西復東歷亂冥迷夜還曉
忽訝雲鬟鬢有絲俄驚霞袂衣成縞謝家庭外總難名
學士堂前不堪掃柳花飛柳枝裊陌頭不覺春歸蚤明
日堤邊聽語鶯萍葉參差滿溪遶

再疊楊花

章臺鏡裏朱顏老處處春歸歇啼鳥青青往日幾長條
舞向東風爲誰攪顰來眉黛故低垂瘦入腰肢已纖小
隨風片片逐遊蜂競蹴紛紛半空表瑤華落遍故園枝
玉團輾破香車道渾疑陌上霧籠春悞認簷前雪凌曉
臺翻飛鷲袂何輕樓弔綠珠衣盡縞捲簾日日度香來
慘徑朝朝帶花掃人未歸絲自嫋翠樓凝望垂陰蚤乍
脫柔枝不忍飛依依猶向津頭遶

山中雜言贈嚴陵趙翁

澗有隱君子結廬依翠微拄笏爽氣入迎簷秀色圍碧
桃窗下鳥聲亂黃葉門前人跡稀秋霜足半粟春雨多
蕨薇寒梅山中友夏荷山中衣歲華幾見花開落塵世
那知誰是非枕上來禽語亭前看鶴歸鼓琴一片石垂
綸三尺磯歷歷前峰七十二朝來惟有白雲飛樵歌唱

方合牧笛音初希杳靄雲中路推敲月下扉子陵千載
空遺蹟好訪羊裘矢莫違

癸丑夏日晤鸞雛仙子於于飛堂詩以識別

金陵三月烏衣巷王謝堂前畫梁上有鳥玄裳嬌不飛
芹泥香戶紛相向迎簷小語語聲柔翻簾嚮觸珊瑚鈎
落花輕蹴隔牆去顧影迴風復上樓憶昔漢王重傾國
後車返載平陽宅雙飛一自入昭陽那惜長門秋艸碧
芳魂歲歲來江南鳳皇臺上春風酣珮環綽約憐顧步
緩歌恍聽聲呢喃蹇子踏遍長安艸南歸惆悵鸞花老
秦淮忽覩莫愁孃抵掌歡逢爲絕倒醉鄉一笑顏乍開

離亭日落關雲哀羽翰欲奮道脩阻何日重歌赤鳳來

子游墓

孫柚

高岡之樹何膺膺子游遺骨埋千古周衰道喪貴縱橫
能從闕里譚盍盍余昔西京東洛遊五侯七貴爲平圃
言生三尺猶鬱然樵牧能稱武城父虞山華塚空莪莪
曾似名賢一坏土

綠珠歎和邵伯如孫子虛韻

黃廷竹

銅鈿荆棘森如束羣馬踰藩睨黃屋羊頭飽殺關內侯
洛陽百姓飢無粥石郎富奢天下知夜夜紅樓醉絲竹
紅樓美人良家子色暈海棠肌怯縠霓袖輕飄燕一雙

鸞吭細吐珠千斛侍中黨逆大強梁欲借尊前歌一曲
亂兵踏破金谷園富貴星飛帝城隩當時許身已許心
不願如禽豷相逐樓中無天奈彼何樓前有地死當速
玉容一墜香魂飛恩愛翻成百年哭妾死可憐君亦死
黃泉兩恨何時復何時復誰鍾此禍驚人目賈家晨牝
啼南風遂使豺狼恣屠戮吁嗟一女猶足憐忍說裴張
與嵇陸

石湖行

施元孝

風吹孤槎來石湖月明如鏡驚夜烏湖中蕩漾萬頃波
清狂忽發倒玉壺須臾飲盡大無棘吳姬夜深不當鑪
幸有仙人紫玉珮換取金莖作醜醜醉後忽思李太白
把盞問月仍歡呼山中老人不解事謂我高陽之酒徒
君不見吳王宮井絕轆轤越王臺上飛鷓鴣今夕不飲
何爲乎

琴酒歌

邵昌鉏

君有龍門百尺之高桐又有山中千日之美酒間來自
理黃金徽興到時傾白玉斗不共伯倫頌大人傻從中
散誇敏手我不解琴復不解酒何以與君朝夕爲友我
笑從君問酒琴悠悠千載誰知音濁醪妙理竟何在太
始希聲何處尋酒有德琴有心相如與陶令一古不復

今我不解酒誰解酒我不解琴誰解琴酌君酒撫君琴
白雲片片飛庭陰高山自有鍾期聽澤畔無勞漁父唵
與君日視笑相契一何深

旅夜

徐培

落日蒼蒼夕景清雁行飛盡浮雲生長風西來勢號怒
千樹萬樹蕭蕭鳴此時客坐寂不語葉落空階亂如雨
朔氣淒淒入夜堂膏缸慘澹寒無光強傾斗酒暫成醉
醒來萬事愁衷腸壯夫寧肯歎離別撫劍高歌爲誰發
夜闌開戶寂無人萬里江天望孤月

憶梅

郊居僻在橫塘曲掃徑開林無雜木手種牆東十樹梅
參差雅傍黃茆屋鐵骨凌寒冰雪姿蚤得春風破香玉
疎枝靜蘸一泓水老榦橫侵萬竿竹年年觴咏花月下
人物相聯自不俗茲歲山城事客遊上正三日辭家速
別時酌酒爲躊躇別後何人伴幽獨冷香畱月怨慘慘
瘦影和煙愁感感神馳故道往復回夢入清宵斷還續
幽思可藉瑤琴慰苦調生憎羌管促索笑惟應待主人
爲君常挂故園目定知歸日春光莫着子青青陰徧綠

江南春

嚴澂

聞關春樹蚤鶯啼歷亂楊花撲面飛美人粧罷着羅衣

海虞文苑 卷之四
羅衣輕楊花軟畫舫清江看不遠大姝先向石湖頭小
姝別上木蘭舟酒氣花香迷白日清歌寶瑟沸中流誰
家公子行挾彈誰家女兒出無伴但見紛紛湖上遊那
知一一津頭散日復日花未闌月復月鶯欲殘江南春
春可憐

題道澈雲松巢四松歌

瞿汝稷

天門峰畔五株松偃蹇不肯承秦封一株東遊爲木公
四株相隨隱谷中貞紉紛葩舞鸞鷲秋幹天矯蟠虬龍
不雨青濛濛寒濤落晴空翡翠朝煙合琉璃夕陰濃北
風撼山霜滿地萬木葉盡乏生氣高騫百尺轉蒼翠仙

標亭亭秀天際驕陽行空石欲流迎風溽蒸却月愁碧
籟鬱鬱常颼颼九夏滄涼疑九秋清音何泠泠一聞九
愁輕要眇若有會沖融不可名雲來恍度金庭詠月白
時傳緜嶺笙木公兀傲邈遺世羽服翩翩寡相契時倚
喬柯吟時當疎影琴世人徒聽紫芝曲對此始知黃綺
心爲問商山避紛處木公笑荅此松深當年我亦巢松
裏白帝飈輪無處尋鬱絕東華君見否解衣試共坐松
陰

飛仙謠

軒皇得玄珠鼎湖飛龍駕雲車伯陽抱兩玄青牛西去

遺玄詮玄津鼓柅代有客炳如明河挂虛碧共見昭回
倚蓋長乘槎誰把支磯石伊余澹蕩人芸芸薄風塵跡
甘雞驚混心與煙霞親五羊夢頻遇三花慕常勤振衣
欲陟綏山巔洗耳思過槐江濱朝有奇士扣我門贈我
淮南枕中文黃童妙音一獲聞冉冉衣裾起白雲曾舉
縹緲超人羣俯視刹土如碁分左拂東臯白榆影右凌
崑嶺璇臺氛虎豹辟易九關啟直集重陽歷旬始清都
罪嵬紫琳宮瑤樓十二橫空起靈艸菲菲不可名珠樹
一一皆連理素娥皦皦顏如雪指余沐浴咸池裏被以
五銖絳綃服衣之雙鳧白玉履相將金庭謁虛皇金庭

鏘鏘列仙史香雲遙擁綠輶浮樂吹驚聞朱籟美狼旌
目擊彭琚遯龍旂彩動丹元喜東華夜光賞不足行對
浮丘坐玄俗時控八景鬱絕遊還頓七轡高暉宿羣真
笑言命余飲碧奈五芝薦芬馥酒半四座丹霞流冷然
共唱方諸曲延賢雜彈雲林璈四珠更擊昆明筑抱容
洞簫和鳴鳳運子流金舞文鶯子晉鼓簧何淒清處妃
調瑟時斷續一詠俄聞東海塵賡歌幾覩搏桑熟歸來
掩關意殊暇葭墻寂寂艸滿舍破榻徒堆玄晏書短垣
不隔方明駕始知平圃在桑戶始知圭竇通姑射支枕
八渟列胸中把盃六氣靄腋下飛燕翩翩黃鵠遊脩篁

海虞文苑 卷之四
三
嫋嫋琅華卸片石常看紫霧留幽霜豈逐繁霜謝誰羨
雲陛騰蘭薰誰羨緇帷擅玉價鶉居優遊忘歲月獨乘
日車靜觀化

元宵宿真州憶燕吳勝事

陳禹謨

憶昔燕市賓僚集綺閣盃傳絃管急六街裘馬競炫熿
五都珍異誇畢給再憶吳中樂事賒錯落華燈映萬家
春盤初進子鶯炙尤憐火樹爛雲霞此夜郵亭足與槩
一燈熒熒復曖曖獨有姮娥照客涂兩地繁華竟何在
燕臺轉盼三千里故國盈盈隔江水屈指歸期元夕後
歡洽親朋同話舊家人爲我貯蘭膏勝事何妨還一復

登霧峯涵空閣望太湖

徐待聘

涵空高閣開湖山七十二峰浮翠鬢袖拂飛雲凌縹緲
窗吞震澤清心顏皓髮老人重一出綠毛仙客成九還
清踪榛莽尚堪討靈駕鸞鶴何時攀青蘿引睇有成約
白日舉身路苦艱不及漁翁自來往飯熟桃花潭島間
贈張選卿餘適山房

何允濟

虞山蒼蒼琴水碧百雉城西煙樹色林麓幽然仲蔚家
蓬蒿薙却耽遊息床頭萬卷讀且盡文成故戢青雲翼
回首青雲不盡才青囊挾得神奇來萬家命脉在君手
會見一林紅杏開春風隨意拾瑤艸石上紫霞閒不掃

日莫青猿採藥歸月明石杵和雲搗爲問壺中幾粒丹
一尊更佐安期棗

洞房曲

徐崇誠

綺羅豔繡幕新香風初轉洞房春流蘇高懸錦絲帳金
屏深擁如花人鴛鴦枕芙蓉褥翠被春溫麝蘭馥芳心
初煖麗情濃翻恨雞聲苦相促銀壺送曉曙光暉日上
紗窗映繡幃此時推枕渾無力瘦減芳肢玉一圍起來
流沐臨粧鏡風姿轉較前時勝纔似當年解語花芙蓉
一朵秋江淨金條脫玉玲瓏蘭湯未試粉先溶粧成雲
鬢秋蟬薄靚掃蛾眉翠黛濃嫣然一笑膩脂香多情却

恨晝偏長春魂一片頻相蕩那得簾籠照夕陽恩情歡
愛常如此莫雨朝雲曾不止一聲鶯轉上林枝回首春
風妬桃李綠肥紅瘦春將莫曾奈新人不如故良人不
是合歡初統扇含愁誰復顧君不見衛莊姜守孤獨阿
嬌曾貯黃金屋千金買却長門賦自是君王方悔悟色
衰愛弛古猶然世上悠悠何足訴

妾命薄

徐崇賢

年初十五理春容黛色鉛華着意工肌理細膩體貌丰
宛如綠水涵芙蓉花姿窈窕臨春風步搖環珮玉玲瓏
自惜傾城嫁巨公珠樓畫閣春重重珊瑚翡翠映簾櫳

海虞文苑 卷之四
新粧麗服貯其中絕勝姮娥明月宮粉黛班行恩不同
色授親承寵沐隆綺筵方丈飫烹龍切管吹雲鳳下空
曲殘楊柳月溶溶攬衣起舞驚飛鴻畱仙裙軟拂輕紅
羅襦縠潤汗沾胸釵鳳斜斜綠鬢鬢香含雞舌歡情濃
錦幄春酣夢協熊夢回曉日光融融雲雨倏然收蝶竦
伯也執爰遠臨戎致勲欲寫麟臺功未許賤妾身相從
樂極悲來歡不終一朝比翼分雌雄粧臺寶鏡玉塵蒙
疾如疾首泣飛蓬涼颼颼吹梧桐長夜唧唧鳴寒蛩
孤房獨宿心忡忡殘燈照影身笑笑人豈亦遙念儂
紅顏薄命愁無窮

玉蚪行

顧雲鴻

谿上老蚪千歲卧骨削皮皴爪甲蛻枕水梢雲截路隅
虎豹狐狸不敢過夜來寒重老蚪驚鼓其鬣鼠行妖精
玉鱗飛空聲寂莫青燐墮地光縱橫夷丘實谷五千里
篠蕩柏栝盡披靡天日蒼黃晴宿霾星河激鮮濕浴水
老蚪狂已氣若蒸渴飲溪上崩層水頭角插地堅已蟄
軀尾搖空驕未騰兒孫散步滿林薄利距銛豪金在爨
喜者蛻蛻相牽糾怒者猙獰相噬搏鈎盤百疊何玲瓏
其中宛轉橋梁通高僧錫杖卓雲路老君鶴髮晞春風
延津飛劍豈在此延陵贈帶無乃是琚璜瓔珞紛自懸

海虞文苑 卷之四
主壁玦環惟所指美人月下影遲遲欲折梅花素手垂
未收交甫綉絳佩誤掣天孫縹緲絲朝暎已麗愁雲平
璫瑤碾薄珍珠明隨他火樹銀花爛得似冰壺玉笋清

送琴友游濟

藤谿四月艸樹幽美人抱琴來谿頭陽春忽發洞天曉
山月俄傳漢苑秋樵歌牧唱滿山野驚聽騷音雜風雅
使我頓深懷古懷古交寧復悠悠者孤猿哀嘯月方低
肅肅秋鴻逐雉飛何來鐘響聞清夜何處笳聲落澗扉
梅花歷亂飄香葉御風歸來夢蝴蝶看罷廣陵山下濤
再美秋江天外棹此際低回有所思况聞西鄰寒擣衣
蒼梧塗山萬古淚不及關雎窈窕妃百變千容絃上指
百緒千端絃畔耳伯牙縱使得鍾期當年可失連城子
多君溪頭十日留無奈溪頭一葉舟松風石澗到時響
流水高山別後愁君今携琴入東魯是處絃歌堪弔古
歸向艸堂理舊綸一夜離情動江浦

雜言六首

金定樂

古人結交心一片今人結交惟在面背憎嗜嗜反掌間
秋雲未易窮其變龍蟠夔伸皆有時衆人親諫何定期
素心只有煙霞侶顯晦升沉不轉移

東鄰少婦織流黃絲脆手寒愁緒長門前租吏怒催迫

海虞文苑 卷之四
織成那得爲衣裳西家富兒紈作袴蜀錦吳綾賤如布
花枝裊裊春風和沉香火煖薰輕羅卜商浪說多文學
百結縣鶉奈爾何

雙眉如蛾鬢如鴉玉臉映發羞鉛華何時織就一端綺
蔚然文彩凝朝霞中有鴛鴦七十二波紋蕩漾芙蓉花
十年在篋無人問還向江頭自浣紗

馬鞍東峙婁江側搜出雲根紫瑤色岳巒玲瓏天琢成
移向高堂煙霧生李家平泉購未得襄陽米顛恨不值
蚪鬚海客輕錢刀買石鑿山山鬼逃山前人家不愛重
遠求怪石充奇供

露井天桃如簇綺游蜂日回心
春戀餘香何所倚宮庭綠槐團午陰鳴蟬當夏揚清音
西風一夕吹高樹抱葉飄零委歧路野鶴昂藏不競時
托身常在青松枝

延津龍劍沉埋久靈氣依然犯牛斗川后馮夷不敢畱
道旁拋擲無人收蓮花繡澁星文黑無復當時金玉飾
市中鉛刀光照人市兒拂拭無埃塵珊瑚琅玕裝作靶
千金不惜輸高價風胡薛燭不再生
泊蠡口月下懷

日夕纜輕舫水邨浮暝煙斯須海月來四顧皆蒼然依

微斷岸縈疎樹傳是鳴夷放舟處館娃宮中絕代姿乘
時燕婉追隨去隨去滄波變姓名白鷗黃鶴遠相迎回
頭齒冷望吳越幾片莫山天際橫浮雲東馳月西駛訪
古長吟向湖水仙路茫茫不可尋空攬清輝結芳芷

鸚鵡洲弔禰處士歌

錢希言

生不從屠沽兒遊一生知己孔文舉懷中刺滅無所投
布衣疎巾三尺杖罵操營門一何壯欲殺竟不殺魏帝
真英雄咄哉劉將軍齷齪不能容憐才復見嫉假手鍛
錫公當筵落筆題鸚鵡魑魅空江走風雨滿堂盡是雕
龍才避席停盃舌俱吐吁嗟身在網與羅鼎俎相尋可

奈何艤臙舟上美搏黍漢東太守如么麼英雄雖歿氣
爲生靈三黃祖名酒酣一歌漁湯摻千秋猶作不
平鳴我過空洲尋艸色楚煙濕江江月黑鷓鴣啼上武
昌樓夜半商人淚橫臆

霍丞相宅行

悲江陵也

丞相身當日月際擁衛幼君功不細二十年來致太平
威權已壓漢公卿公卿伏地莫敢仰叱咤風雲股掌上
諸子紛紛金馬遊里中甲第如雲浮前堂管絃後歌舞
一曲未終月已午卷簾燒燭酒淋漓北斗闌干客散遲
曉來公子醉不起花落鸞啼香夢裏當時自謂山可傾

寧知驂乘禍先萌一朝身亾煙焰欺地宅田園都籍沒
堂帶金缸翠暗消空餘別館艸蕭蕭井花斑斕瓷花碧
公子歸來已無客君不見寢丘封地已千年荆人獨頌
叔敖賢

怨婦曲代內寄

秋濤噴雪錢塘岸織子帆高插天半傳郎買棹過桐廬
書來却傷奴城居奴城酒旗紅刺日女兒解吹銀鬢篋
化渡接芙蓉江當門夜吠金鈴老烏栖高樹馬不發
日傾醉歌樓月授衣時節未歸來相思直到梅花開
短神祝郎心無準應難卜瑣窗繡戶玉盤龍

不信娼家反勝儂儂今烹却青驄馬教郎坐對鴛鴦瓦
進酒歌奉壽無登從兄

棠梨落盡桐花香小槽酒色新柳黃叵羅金屈爛齊光
盤上好采分鴛鴦菜傳青絲荀碧玉江魚之脂美如肪
激石停吹哀絃罷鼓流鶯不語山日欲午衆賓避席主
起舞賤子爲歌擊瓦甌緒君醉莫逃聽我歌且謔才不
必雌龍擅譽不必靈龜高得囊中一錢亦足以豪借問
五單二酉貯滿腹何如朱提赤仄黃金刀君不見吾兄
少年負才誇赤汗操觚往往稱秦漢家婢泥中常誦詩
室人壁立空增歎又不見吾兄酒酣耳熱歌烏烏箕踞

傲倪旁若無平原笑癖無乃類淳于飲量未肯輸十千
那得頻沽酒擬吸南箕吞北斗日日看花似霧中一醒
一醉亾何有醒來還醉醉來眠天地日月俱茫然兒能
扶杖孫繞膝不覺優游六十年世間快意須眼前何處
眼前不快意眼前且聽春風顛昨日今朝竟誰是淒涼
舊事東流水男兒富貴旣難須慢世無不可爲耳請携
山中玉斲出芙蓉環贈君佩之得大還少年如花不可
攀自古何曾有常圓不缺之明月亦未有重美好之朱
顏兄爲公孫朝我學公孫穆名姬兩行齊黛綠壘頭采
花春百斛一醉從教萬恨平看他海底桑根生

長歌送友人北上

錢謙益

顧生別我向燕市半是壯游半客子中夜置酒金昌亭
坐客凄其但相視顧生酒酣忽慨慷自言少小憎紈綺
墮地昂藏似宿因束髮經奇苦無比讀書涉獵羞成誦
搥筆飛揚能滿紙齊名二陸頗易豪減價三張浪稱美
賈生太息真少年終童矜奮徒爲爾跌宕長看千古空
滅沒今人詎足齒傲骨翻從名下藏雄心偶向酒中使
洛下老生總側目吳中兒子供長跪摧頹不分歲月非
侵尋空覺頭顱是二十騫騰已較遲只今三十尚如此
三十蹉跎可若何薊門燕市俱奔波奇數誰能分虎鼠

高名不辨變龍蛇自厭半生成落鳧拚將四體付沉疴
衣冠攝體履襪懈枕簟經旬蟣蟲多一家骨肉寒暄改
一室親朋笑語差淹留病鬼慰寂莫潦倒牙僧相經過
長令骨節經偃蹇豈有文章阻嘯歌折莫西山採薇蕨
乍可東門壞拉攏顧生語罷三歎息搖風忽起北斗匿
坐中龔何慘不言陸生掩袂更悽惻余也聞之心欲死
俯仰天地何偏側與君婉孌纒經年與君傾倒自夙昔
憶我初從都下歸黑貂敝盡無顏色骯髒不禁世人殺
低迴苦爲妻孥抑垂頭仰面百不稱對君徃徃抽胸臆
呼酒粗澆目睫愁挑燈細解膏肓或鬚眉數子能位置

項領兒童任翻覆悠悠不受路鬼憐咄咄爭知造化逼
我愁君病興逾狂強顏闖入少年場把臂半成游冶子
酒壚移向狹邪旁盧家少婦牽衣坐半老徐娘貰酒嘗
厭厭夜雨呼盧醉熒熒初日畫眉長更有嬌童解歡笑
輕衫短袖相扶將枉殺閨中呼蕩子儘教陌上喚兒郎
爲歡日淺苦不足絲肉欲奮在已促浮沉苦樂心自知
深情豈向旁人告才名十載曾詛楚遇合今朝俱望蜀
游戲佯登傀儡場從橫真鬪臬盧局歌舞由來多苦辛
煙花是處饒榮辱丈夫眼前耐顛倒英雄腕下難拘束
掩抑寧隨雞犬行奮飛終識神龍欲卽今別離詎幾許

長歌短泣黯相屬寸心自可敵風塵血淚那堪灑奴僕
吾曹不作游子悲夫君豈爲長安粟長安世事難具陳
漢家有党秦無人相將扼腕歎當局相期策足據要津
看君彈冠碣石館遲我高歌易水濱五陵王氣鬱葱甚
感激應須蚤致身

金龍歌

何世滋

嘗聞林屋洞側唐時遣使投龍醮祭至吳越王時尤
謹歲丁酉秋日余與里中金生輩同遊洞中抵隔凡
昔人所書洞窮處金生得金鑄者若龍螭類凡八種
以一龍貽余曰願子變化似之余謝不敢當乃憶舊

志志投龍事匪誣也賦歌侈之

林屋景最勝所藏物亦奇慷慨金生負俠氣直入隔凡
取龍螭謂我魚腹龍其骨鱗鰓河津豈隨汨般勤贈我
兆變化閃爍晶熒氣鬱勃我窺金庭入竟得金龍出龍
玄備五彩金色夏灿灿頷邊吐紫生祥雲甲上騰輝耀
白日夙聞神籙闕玄宮帝王鑄龍投此中一朝辭洞降
塵凡龍乎龍乎數何窮嗟我未是攀龍手胡爲霧物隨
我走我同龍處蹄涔間比龍鱗角尚未有龍今還向晦
處藏正似諸葛高卧于南陽龍今還與高士友邴管應
推華歆首不歎神龍已失水不能登天必且困螻蟻聊

蟄我處存其身可變竹杖騎仙人須臾六合八荒俱可
臻嗚呼能潛能見乃爲神

題郭文學種樹園

釋慧秀

益津地苦多風沙卉木春深未發芽冰花簇沓土膏涸
空郊盡日飛寒鴉城東有園屬誰主云是郭家工種樹
參差高下皆青葱芍藥辛夷徧林陽橐駝去今凡幾世
况復當時羞偃僂總然種樹兼種德難與君家共宗譜
郭君胸富五車書雄文一掃雲錦舒才名遠播自下邳
磊落高懷薄太虛穠桃郁李毋可羨梨棗千頭足資燕
繚垣垂柳百十株二月老梅花似霰此時娑娑向花立

此時抱甕臨郊甸考槃在陸長寤歌白眼斜看世人面
卽今玉樹凌青霄交柯疊蔭春風旣含煙帶露吐華萼
遙望亭亭雙錦標家門有此福萬倍哀情何必憐天喬

酒狂歌

長鯨一吸百川盡酒狂百斛那足論綠缸新涑葡萄醅
舉向花前煖香噴花明艸縹山之丘聳歌蝶舞春風柔
看花藉艸引瓊露一飲一醕興未休胸襟磊落孰可擬
玉山倒挂雙飛蚪酣呼傲睨隘萬古典哀何足牽眉頭
醉鄉日月任糜爛雅知中聖逾封侯披襟散髮枕糟麴
笑視六合皆虛舟酒狂之狂誰與儔劉伶阮籍相綢繆

風姿醉態兩綽約尊壘散湯無人收君不見癡兒珍珠
填崖谷一棺僅足容骷髏又不見秦宮漢寢平泉谷蒼
煙野蔓藏鳴鳩嗚呼不飲將何求人生美祿多前脩醉
眠花雨滿衣幘松陰覆地聲齣齣

山居自咏

釋法乘

春來無事日日閒良朋挈我觀海山海神現身風雷作
山靈潛迹蒼波間遠天日映光湫湫老樹霧濕苔斑斑
鄰僧邀我置盤餐欹斜散坐松一灣白雲客過開笑顏
青蘿身墮何綿蠻摩娑待月梅花上月上梅花人未還

七言排律

